

船  
山  
師  
友  
記

船山師友記第十

湘潭羅正鈞纂

周明經士儀

周士儀字令公號菴園鄱縣人寓居衡陽安宇溫恭襟度朗徹七歲能文崇禎中拔貢遭世亂不仕時貴卒充斥父祖被虜掠士儀泣求身代卒義而釋之自是閉戶著書作史貫十卷野獲編若干卷書成挾之出游嘗過夷門謁闕里探禹穴所至慷慨憑弔見諸詠歌有碎琴邁吟杭游襍詠南行句紀諸集令公之學皆寓於史貫一書王船山先生曾亟稱之晚歲築菴語人曰藜藿吾所甘暮年當愈篤耳卒年七十二

衡陽縣志本傳  
沅湘耆舊集小傳

明紀野獲序

薑齋逸文

云菴園周子撫遺文擲碑說擴誦敘一

代之典成通紀野獲二十卷示夫之而俾示其指菴園以淵  
涵霞建之才謝世榮以孤游歷燕趙吳越訪故家之藏書問  
遺民之記憶以起二百八十餘年九原之先進相爲挹注是  
編之成未能卽問之世禹峯石廩應爲珍護又非溫公之資  
鏡治原已也

七十自定橐甲子年有寄周令公一首

七律

正鈞按先生逸文尙有爲令公史贊序一首節存湖南通  
志蓋卽耆舊集小傳所本明紀野獲序今編存湖南文徵  
卷三十三自定橐甲子一詩有云歸舟吳越迎歌扇潭水

滄浪廢杖藜蓋令公新自吳越歸時所寄野獲序當亦作於是時也

又按逸文武夷先生行狀云攸子若聘鄱縣文學周士侃女士侃當是令公昆弟

### 李學博燦

李燦字叔晦巴陵人前明壬午舉人國初官衡山教諭遂家南嶽叔晦有名于時詩近擊壤體沅湘耆舊集小傳

薑齋分體彙辛酉年有得李叔晦秋訊云同周令公來訪未

### 果一首五律

正鈞按同云令公來訪是時叔晦蓋已徙居南嶽

劉孝尼

劉孝尼

見薑齋文集

劉孝尼詩序

薑齋文集

云友人劉孝尼著山書者余知之七年矣

余雖羸者請與孝尼狎主齊盟裏菁茅塞芳芷就銅官鑿石之遺壘以爭長中原

正鈞按先生所交劉姓甚眾孝尼之名與爵里均無攷據詩序所云當係長沙府屬人

劉平思

劉平思

見薑齋文集

硯銘序

薑齋文集

云余兩赴端州未能得一佳石水師將軍管燦

舊爲制使丁魁楚開靈羊峽坑家有數石其子貽余一硯庚寅冬桂林覆敗爲叛吏挾家人奪去旣返山中無以和墨劉平思畀一石子外璞中膩差類小龜卽非至者亦頗受墨相隨二十年矣平思下世倏已五載欽佩故心聊爲銘之

正鈞按行狀云府君自辛卯迄辛未四十年賣心不墮用力不懈先生由桂林返楚在庚寅後一年辛卯今序云返山中無以和墨則平思之硯必貽於是年可知辛卯下推二十年爲康熙九年庚戌而平思當沒於丙午也平思當是其字其名與爵里俟攷

黃將軍金臺

黃金臺新安人明故將國變後披緇稱廣明大師

薑齋文集

梳銘序

薑齋文集

云新安黃將軍金臺披緇稱廣明大師請余爲

小傳見贈璫瑁梳一合云藏之無用久矣非先生無可贈者  
感其意而銘之

正鈞按廣明大師小傳今文集未見金臺應是永歷故將  
以國變後披緇詳文集是銘列于南窗銘之前南窗卽觀  
生居作于康熙己酉時去緬甸覆沒已逾七年此序云藏  
之無用久矣必此數年間金臺游衡相贈也

又按明季南略載有徽人黃廣明季武狀元與黃澍同族  
能運鐵鞭二十四斤率眾固守徽州身爲前鋒所斬獲甚

眾後敗走閩閩復陷招之不降乃削髮爲僧此黃將軍正爲新安人未知係否一人存以俟攷

### 張都督國祚

張國祚字永明湘潭人明末以軍功官副將軍丙戌夏四月六日阜口兵潰萬元吉入贛州故贛督李永茂自南雄遣國祚與吳之蕃帥粵兵五千拔贛贛城倉皇爭竄元吉欲斬其妾之出署者人心乃定桂藩立倚國祚以通湘邵授左都督副瞿式耜留守桂林及奔雲南國祚從軍至竹華嶺眾潰其妾孫氏呂氏相對自經死國祚旣免永厯傾覆隱居二十餘年王夫之間過之悲論往事爲詩弔孫呂稱國祚爲老將或云其後爲僧以終



六十自定彙乙卯年有風泊中湘訪張永明老將弔孫呂二  
姬烈死讀辛卯以來諸公獎貞之篇放歌以言情孫呂事詳  
中舍管公記一首

歌行

正鈞按年譜劉氏毓崧曰按詩中有云二十六年春蔓長  
我與張公四鬢霜又云茫茫峒雲結煙草貞魂不舍蒼梧  
道又云君不見張君二婦灘江濱俄頃千秋如截鐵由乙  
卯上溯二十六年之前歲在庚寅是年桂王由梧州播遷  
張永明當是桂王舊將其側室孫呂二姬殉難於梧州灘  
江之濱辛卯卽庚寅後一年也又云哀歌血淚洒青天管

子嗣裘金郎堡而我悲吟獨待今二十六年愁埋心左掖  
蒙生俱未死軍中彈淚秋陰深管嗣裘卽題中所云中含  
曾爲二姬作記又與堡同作詩二人已前沒而正發猶存  
先生與正發同至萍鄉又同還湖南同泊湘潭遂作歌以  
追弔二姬也又云昭潭萬波疊霜穀南望灘江暮雲綠驚  
鴻叫雲天不開秋夕孤飛遙痛哭則泊舟湘潭在九月也  
按劉說極核康熙十三年甲寅吳逆陷湖南各郡先生出  
居于外次年復遣僞總督黃乃忠等合兵數萬由萍鄉窺  
袁州故先生寓萍鄉未久卽還也

徐廣文芳

徐芳字蔚子本姓徐長沙人育于湘鄉簡氏故又從簡姓字在  
雍當時徐蔚子簡在雍之名最著實一人也順治末以歲貢官  
常德訓導有種竹亭稿王船山先生序之沅湘耆舊集小傳

種竹亭稿序薑齋文集云不知今之以白首對江山遽爲殘夢又

云余與蔚子雙影相憐不禁神盡而余少于蔚子衰乃倍之  
五十自定彙戊申年有徐蔚子虎塘遲至余暑病先歸蔚子  
獨留萬綠池與若啟月飲共相太息寄此謝之一首七律

戊午年有寄徐蔚子一首五律

正鈞按黃氏楷盛湘鄉縣志簡徐芳傳云順治己丑充歲  
貢生官常德訓導以病乞歸晚年卜居于鄉按己丑爲順

治六年期蔚子遊虎塘在康熙七年戊申蔚子時當已罷官家居文集卷四六十初度答徐蔚子啟有云刀兵劫改僅存鵠渚之弟兄生死夢中還憶虎塘之歡笑虎塘卽游湘鄉事鵠渚當指武昌黃鵠磯是年寄蔚子詩亦有黃鶴一壠仙重逢腹已便之句據此蔚子蓋曾與先生同應鄉試而晚歲居鄉時始一再晤于劉若啟之虎塘爲序其文故啟中專就此二事道其情也

又按耆舊集鄧氏顯鶴曰夕堂所與遊多肥遯苦節前朝遺老蔚子官本朝夕堂待之不少減知其致此必有道矣豈亦有不得已于中也今按先生交遊諸人除後進外

詳第十  
二卷

入官我

朝者惟劉杜三自煜

詳弟

殷裕日銘

詳弟

八卷

李叔晦燦及徐蔚子三數人然皆未嘗騰達迹其始終

蓋有如鄧說不得已于中者而先生待人以厚所謂故者  
無失其爲故尤不必以斤斤之淺見相測也

董副將啟行

董啟行松江人從章文毅曠爲管糧參將丁亥兵潰文毅退走  
永州啟行相依患難誓以死殉文毅歿于東安啟行葬之石磯  
站督師何騰蛟題補啟行爲督標賞功旗鼓副將仍令管恢撫  
營糧餉啟行協和諸將諸將亦委心焉未幾師駐全州聞逃寇  
將發章公墓啟行遂留全陽五年見章公子奇貧啟行不避艱

險隻身數千里扶章公靈輓還華亭

蒙正發三  
湘從事紀

正鈞按七十自定藁甲子年病起連雨詩第四首云潛聖  
峯雲碧萬層蕭蕭杉竹託山僧辜恩垂死餘雙淚扶病今  
生夢一登多日六經藏孔壁何人十字誌延陵湖天秋水  
魚書絕寂寞孤阡挂古藤自注云春初因松江董斯行請  
誌銘于竟陵吳旣開期以秋至不得年譜劉氏毓崧引此  
云潛聖峯爲武夷先生譚太孺人合葬之地己未年送章  
載謀歸吳淞詩次首末二句云片石延陵字他年待報章  
與此詩何人十字誌延陵同意蓋卽託其先容至上年癸  
亥年成行狀故復申前請按耆舊集虎止贈董君達詩

正鈞

按詩題云董君年八十矣以章大司馬祠碑及陳烈婦碑  
文遠來相訂并示以載謀近札詩云憶昔弱冠時逢君戎  
馬間言偕章公子避地入寒山先君稱執友往事述仁賢  
示相迴落日桑榆暉霜寒君爲門下士鋒矢護完棺秉彝  
有同心言反吳江橫又云上湖陳宜人抱志沒漣洲擁  
烈女墳波激壯士肝翁來爲挂紙淚灑靈石頑鄧氏顯鶴  
云章文毅曠卒於永州陳夫人則其妾陳氏也有武人要  
之陳赴水死湘人葬之漣溪東岸大水冲齧溪岸墓獨無  
恙詩又有云昔翁來重游余棘方顯連握手湘岸櫻落照  
春光闌翁復弔船山山陽淚潺湲則先生沒未久達嘗至  
衡陽弔唁今知載謀歸吳淞時與之偕行達字與斯行意  
復重來也

頗相近疑董君名達字斯行取行義達道之意其始終與  
章氏相依蓋亦隸籍淞江意者斯行與達卽一人歟詩中  
有云翁來爲挂紙承上陳宜人而言是歲董君至湘鄉省  
視烈婦墳便道至衡先生因屬其過竟陵時請誌于旣閑

也按劉氏推測絕具苦心今攷景船齋稌記

章載謀有卷謨著詳後

上一條云先文毅公以丁亥七月入閣八月薨老僕董啟行吾家之與駢也流離顛沛扶柩回松忠義之色溢于眉宇云證以三湘從事紀所述與虎止所贈詩則董君達與啟行確是一人而自定稿作斯行爲筆誤無疑

### 季簡尤

季簡尤吳興人

鼓棹初集虎止詩序

鼓棹初集有贈季簡尤初度瀟湘逢故人慢一首

自注簡尤五十髭髯

如雪已十餘年矣

正鈞按耆舊集載虎止詩有吳興季翁簡尤垂弔先人塋



遂約共游燕趙唐躬園力爲阻行有作述懷五古一首蓋  
卽此一人其名俟攷

何詣得

何詣得

見自定彙

七十自定彙丁卯年有夏日喜何詣得見過一首

七律

正鈞按詣得惟一見七十自定彙名與爵里無攷

船山師友記第十一

湘潭羅正鈞纂

陳孝廉觀

陳觀字二止安福人鼎革後與兄箕南不薙髮箕南死于甲午觀隱山中晚年靜極而慧生有來訪者必先知之或不當晤身先避去一奴供炊汲子弟外不見一人後因山賊亂諸郡縣兵過其居見其髮以爲賊也執之以歸縣鄉人皆知其賢謀劫之途觀曰無以我一人故累及一鄉立諭眾散使歸報子弟可與棺一具來縣前吾將死矣時知縣蕭恆夜鞠之曰吾不忍先朝逃深山窮谷中以全吾髮爲聖世之夷齊一奴外無他人往來

室無寸鐵予將何爲知縣審其非賊諭令雍髮曰是不能矣惟  
有一死已令子弟具棺于外矣令益賢之錄其詞上之于郡守  
郡守諭之再四堅執如前守大奇之曰是非賊縱之使歸全髮  
山中後數年沒自二陳高風被于鄉里至今烏兜二十餘里皆  
化之耕讀不應科舉深衣幅巾見官長亦不變此風海內無有  
也

廣陽  
裸記

永厯實錄劉季鏞傳云陳觀字二止安福舉人安貧祇節自  
吉安陷與妻子訣寓食攸縣山寺羅糲不給或飲水以終日  
菹齋詩贍藁有寄陳耳臣兼懷安福陳二止一首

五律

正鈞按二止與兄陳狂農南箕俱以苦節著聞與先生交

接惟賸藁一見陳耳臣攸人寄懷之詩未編年分殆正作于二止寓攸之時徐令素唐躬園墓誌有云躬園欲訪廬山求安成陳二止先生覲歐陽懷雲先生隸宗事之船山先生許焉以父病不果行今詳五十自定藁乙酉年有昭陽庵同須竹夜語云乘木葉秋波探五老之勝因便送之七律一首則躬園墓誌所云甚確特未知二止以何時去攸年譜劉氏毓崧曰誌言欲訪廬山求二止者蓋兵戈定後復返江西也今證之廣陽襍記二止固沒於安福矣

陳明經五鼎

陳五鼎字耳臣攸縣人崇禎朝貢生官耒陽教諭有雨餘堂文

集耳臣性狷介刻苦自勵無子亂後隱居深山不出與王船山

先生交好一通問而已

沅湘耆舊集小傳

詠木魚詩序

六十自定彙

云觀生居黏比年人士酬贈韻語兵警

後爲俗惡人盡擲棄之惟攸縣陳耳臣二箋僅存裴衷不忍捨日用覺其詠木魚詩未當作者輒和二章不能寄耳臣差賢于存沒諸公之逢蠹蟻無從靜對已爾

六十自定彙甲寅年有陳耳臣老矣新詩猶麗遠寄題雪諸詠隨意和之得四首

五律

正鈞按贍彙有寄懷陳耳臣一詩當作於康熙己酉以前

詳前

觀木魚詩序及題雪詩則耳臣於先生寄贈非止一次

鄧傳一通音問之語稍爲失攷又攷病枕憶得乙酉年有  
耒陽曹伯實翁招同陳耳臣廣文訪杜少陵墳墓一詩乙  
酉爲順治元年福王稱宏光元年時耳臣尙爲耒陽學官與先生  
相晤也

### 龍孝廉孔然

龍孔然字簡卿湘鄉人兄弟自相師友明末領鄉薦旋棄去鼎  
革後閉門授徒經略洪承疇欲延之幕府不就湘人傳有拯湘  
錄墮糧逸案皆其所手纂也沅湘耆舊集小傳

梅花百詠自序云抵今十五年矣今歲人日得季霞伯兄簡  
卿寄到伯修元稹潛然讀已以示歐子直

正鈞按簡卿于先生游湘鄉時

詳弟七卷

未見名字百梅詩和

于康熙乙巳序云抵今又十五年承上文庚寅在蒼梧而

言相距正十五年而去伯修季霞丁亥之遇難則十有九

年矣是時簡卿尙存也

按湘鄉縣志簡卿傳云年九十二始卒

### 李孝廉占解

李占解字雨蒼嘉魚人大崖先生承箕裔孫明季舉人早與金

正希尹洞庭熊魚山齊名國亡後不應公車年七十三卒

南窗漫記

目定  
棄詩注

南窗漫記云嘉魚李雨蒼占解寄余此詩云欲涉湖相訪時

年七十矣閱兩歲遂長逝不果所至雨蒼大崖先生裔孫國

亡後不應公車唐須竹爲余過其家省之蕭清戶庭猶楚雲

臺風味也

自注楚雲臺白沙子嶺南以館大崖者

讀李大崖先生墓志書後

薑齋文集

云先生裔孫雨蒼氏占解年

七十三矣以王文恪公所撰大崖墓志銘寄唐生端笏使與

夫之共讀謹識其後以訊雨蒼當如面談矣

六十自定臺己酉年有孤雁行和李雨蒼一首

歌行

壬子

年有得須竹鄂渚信知李雨蒼長逝遙望魚山哭之五首

七絕

薑齋編年臺辛亥年有李雨蒼年七十三矣書至期遊南嶽

若必果者反寄馳望一首

五古

七十自定臺辛酉年有得嘉魚李西華兄弟書追憶雨蒼一



首五  
律

正鈞按年譜劉氏毓崧云七十自定藁辛酉一詩有云南  
游弔大崖自注云世卿先生自白沙歸遊南嶽又云遺怨  
留鴻字自注雨蒼舊作孤雁行見寄今按史傳及各書世  
卿卽李承箕之字別號大崖嘉魚人成化二十二年舉鄉  
試爲陳白沙高弟先生和雨蒼詩有千秋渺渺楚雲臺之  
語自注云楚雲臺乃白沙留雨蒼五世祖大崖先生讀書  
而築輿漫記可以互證己酉雨蒼年七十至壬子則七十  
有三其寄大崖墓誌藁後不久卽卒己酉至壬子中隔庚  
戌辛亥兩年故言閱兩歲而長逝也六十自定藁壬子年

哭雨蒼詩有尋常雁塔稱兄弟之語則雨蒼舉孝廉蓋與先生同年漫記載雨蒼孤雁行原唱云開函讀之淚橫流一別二十有八秋又云孤雁孤飛孤自哀多君兄弟共衷衷先生與石崖先生以壬午同舉於鄉雨蒼與先生兄弟相晤當在是年省試之時自壬午至己酉首尾正二十八年也按劉說推測甚核今據編年彙反寄馳望一詩則唐須竹當以辛亥年過其家雨蒼期游南嶽因寄大崖墓誌彙先生寄詩馳望當并書後一首以次年復遣須竹寄往觀王子哭雨蒼詩題云至則雨蒼已沒因就赴哭也按哭得須竹鄂諸信可證詩第五首云孺子生芻蕘暝煙自注須竹赴哭未歸

黃度長

黃度長

見白定稟

五十自定稟戊申年有答黃度長一首

七律

正鈞按年譜劉氏毓崧云詩有云濱水連湘一雁征濱水  
經寶慶入邵度長蓋邵陽人今按詩後四句云傳經魯壁  
聞絲竹述酒柴桑訪秫秫心迹原同難舉似雲飛葉落兩  
含情度長蓋亦以高蹈著節惜其名與本末不著也

劉孝廉培泰

劉培泰字篤生湘潭人崇禎三年舉人順治中與郭金臺王岱  
等友善然自明亡語不及時政好養生家言從南嶽道士李常

庚游若有所得以舉似王夫之夫之贈詩甚禮敬焉稱曰篤生

翁有琴心堂集佚弗傳

湘潭縣志 湖南文徵姓氏傳

愚鼓詞謬授鷗鵠天詞序

夕堂戲墨卷八

云無師之師其惟夢乎無

夢而謬非師而誰任爲師謬之明日中湘篤生翁投余詩云

三一從茲守策名玉洞仙不期而與謬應然則謬果余師也

正鈞按戲墨卷八未著年分愚鼓詞後接編和青原藥地

大師十二時歌蓋出一時所作大師卽方密之詳六十自

定彙辛亥年次密之述懷詩有云別調相看已蹶然別調

蓋卽指十二時歌據此則篤生寄詩亦在此數年間又按

編年彙癸丑歲晚養疴詩第四首云昔登金簡峯遙與王

娥語金虎含青珠黃膏釀香醕微光生西清中天燦華炬  
飛雲定可乘揮手謝寒暑目笑不欲然栖心非懷土晨來  
叩門客慰藉悲辛苦胡爲聞要言躑躅成幽阻此詩作于  
癸丑去辛亥只三年詩中所述與愚鼓詞序辭意略同蓋  
先生時亦旁及養生家言外間所與究論者藥地大師外  
則篤生翁篤生以崇禎三年庚午得舉下邳辛亥已四十  
年其年輩均長于先生故稱爲翁也

又按篤生一號樸庵居士順治中興修湘潭縣志見鄭有  
成縣志序

吳處士驥

吳驥字旣閑景陵人崇禎時舉人雅慕陸鴻漸之爲人淡泊  
涼不求榮膺終身隱居東湖之上行履高潔超然自遠于流俗  
著有浮園詩集

王士禎帶經堂集浮園詩集序 湖北詩人徵略

七十自定癸甲子年病起連雨弟四首云潛聖峯雲碧萬層  
蕭蕭杉竹託山僧辜恩垂死餘雙淚扶病今生夢一登多日  
六經藏孔壁何人十字誌延陵湖天秋水魚書絕寂寞孤阡  
挂古簾白注云病不得省墓春初因松江董斯行請誌銘于  
竟陵吳旣閑期以秋至不得垂死病中念此二事唯有痛哭  
正鈞按年譜劉氏毓崧曰先生戊辰年作武夷先生暨譚  
孺人合葬墓誌云前此幾幸當世知道君子拂拭幽光而

頻仰人間無可希望弗獲已而質述大略是旣閑之文終  
未果作故自誤也至於旣閑之名及其本末雖無明文可  
徵然先生旣請其表章先德則亦非常人可知今攷漁洋  
帶經堂集知旣閑名驥蒙正發三湘從事紀云永厯二年  
李成棟反正三楚賢士陶汝龍吳驥曾光祖梅念隱王世  
顯俱授御史恢復召用按云恢復召用則旣閑終未出山  
可知又浮園詩序末言昔先生年七十嘗寓書湘潭王教  
授徵予與施侍讀詩爲贈戒勿泛及先生沒子鼎彥刻其  
遺集遠涉三千里乞余序之云云按王教授當卽吾邑王  
山長岱

詳下弟  
十六卷

漁洋序中惟以陸鴻漸相形觀戒勿泛及

一語旣閑蓋勝國遺民序文亦不欲顯言之也又按耆舊集載劉友光杜三懷贈旣閑詩云青烽南望歲炎炎何處謀身可卜簾老去哀多聞庾信魂銷別後獨江淹蒲颺夕指漁梁火明月人留市酒帘愁絕江天吟日暮同誰端坐憶茅檐湖北詩人徵略載天門胡石莊贈旣閑詩云之子來何晚山中木落時清談連夢寐月色在階墀汀草吾將刈舊遊君莫思寒宵兩客鳥共對一霜枝其於旣閑之本末亦可互證矣

蔣九英

蔣九英

見編年

爵里無攷



薑齋詩分體彙辛酉年有得蔣九英訊書及閔雨之歎一首

律七

正鈞按九英惟分體彙一見名與爵里族攷

劉敕功

劉敕功成安人

黃齋詩分體彙

薑齋分體彙甲子年有得安成劉敕功書知舉主黃門歐陽

公已湔逝三年矣賦哀四首

律七

正鈞按黃門歐陽公卽方然先生先生壬午舉主

詩敕功卷一

詩分體彙編於甲子云湔逝已三年蓋沒於康熙二十年

辛酉敕功乃其邑子必與先生舊日相識其名族攷

歐陽喜翁翁

歐陽肅字喜翁成安人先生舉主給事中霖之弟亂後隱居不

仕

蓋齋詩分體彙

蓋齋分體彙丁卯年有安成歐陽喜翁肅先師黃門公弟也  
守志約居惠問遙獎於六袞之年馳情寄書述往永懷示孤  
貞之有自也爲得十七韻

五排

正鈞按方然先生沒於康熙辛酉去喜翁丁卯寄書訊問  
已逾七年故題中有永懷之語觀此益可證先生於歐陽  
公師門之誼甚篤矣

龍龍衣翼

龍襲字龍衣城步人亂後逃禪精研內典

寶慶府志遺民晏際盛傳

### 李明經遇唐

李遇唐新化人崇禎末恩貢嘗敘述鼎革時事及楚黔內附本

未甚悉

晏際盛傳

正鈞按鄧氏顯鶴云二人見夫之龍源夜語皆遺民也詳

遺書目錄有龍源夜語注未見

舊歲聞之衡陽友人此書稟本先生裔孫持以贈餘

姚朱同夫學使未識其家尚存副本否增識於此

然二人先生既列之載記則亦

相知問也

### 程孝廉光禪

程光禪字奕先錢塘舉人

黃九煙集

薑齋編年彙乙卯有贈程奕先一首五古和程奕先長沙懷古

三首五古

正鈞按是年先生以避吳逆之亂出居于外故與奕先相遇于長沙也

程大匡

程大匡安成人遺興詩小序

和甘蔗生遺興詩序云在嚮者有人箸書說西子湖頭一佛出世罷參向南高峯去心知其不然湖光山色儘一具粉骷髏淡粧濃抹和哄者跛漢不住又安成程大匡書來說五老峯前遠公延客庶幾或爾

正鈞按序中皆言金道隱輓迹大匡爲安成人先生出歐陽先生之門故與其邑人常通音問也

船山師友記弟十二

湘潭羅正鈞纂

歐明經大生

歐大生字子直衡陽人康熙中貢生船山先生有同歐子直劉庶仙登小雲山及深秋望子直數詩可想見其人品矣沅湘耆舊集小傳

梅花百詠序云今歲人日得伯修元稹以示歐子直子直欣然屬和仍從與老漢爲前驅祓道時方重定讀書說良不暇及又跋云子直云旣不以馮題爲雅則胡弗易其甚者葺齋詩賸稿甲辰年有同歐子直劉庶仙登小雲山一首七律

五十自定藁甲辰年有又雪同歐子直一首律七五日攜笈兒

同子直伯賢從哲仲小飲分得端字一首律七乙巳年有

秋雨同子直一首律七丙午年有歐子直自南嶽返訊之

一首古五丁未年有元日過子直弈一首律七己酉年

有深秋望歐子直一首律五

正鈞按衡陽縣志選舉表子直爲永州教授歐從墜子百

梅詩序作於乙巳先生自順治十七年庚子定居湘西朝

夕過從者如劉若啟象賢李芋巖國相劉庶仙近魯諸人

皆一時遺老均詳上卷此外則子直爲最著觀百梅詩序自

稱老漢自定稿各詩亦皆留連景物之詞子直蓋同里後

學而其志趣有足重者故時得從先生遊也

李大令何燁

李何燁字緩山沔陽人順治壬辰進士官黃巖令以直道見忤  
謫廣西按察司經歷生平和易近人所與游皆一時名宿楚詩紀小傳

六十自定稿乙卯年有出郭赴李緩山之約桓伊山下遇雨

一首七律

葢齋詩編年稿乙卯年有次李緩山見寄卽用其體書懷馳

答一首

五古

與李緩山章載謀同登迴雁峯次緩山韻一首七律

正鈞按乙卯書懷馳答一詩編年稿編於拜蔡公祠堂一



首後長沙懷古三首之前蓋是年先生客長沙時所寄證以桓伊山下登迴雁峯二詩時綏山當客游衡陽也

余兼尊

余兼尊桐城人

六十自定稿

六十自定稿丁巳年有桐城余兼尊昔爲青原侍者歸素以來崎嶇嶺外相值見訪爲錄前寄極丸老人詩仍次原韻贈之一首

七律

正鈞按年譜劉氏毓崧曰按極丸老人卽方密之歸素猶言還俗蓋兼尊與密之皆桐城人密之主青原方丈時兼尊爲侍者密之沒後兼尊還俗游粵至楚與先生相見於

衡也前寄極丸老人詩卽五十自定稿內寄懷青原藥翁  
詩七律一首藥翁蓋密之爲僧後名藥地其詩亦用心林  
琴吟深五韻按劉說極核方密之沒於王子兼尊來訪以  
丁巳去密之之沒已六年也

徐令素

徐令素華亭人明僉都御史孚遠之從子

七十自定稟

七十自定稟甲子年有徐合素自南來抵郡城遠訊船山代  
書答之尊世父闇公從海上卒於嶺表廿餘年矣因寓我尙  
爲人之歎一首

七律

正鈞按南疆繹史闇公名孚遠華亭人崇禎壬午舉人與

陳臥子夏樊仲齊名隨魯王以海浮海戊戌滇中遣周金  
湯至臺晉諸勛爵遷孚遠左僉都御史明年鄭成功舉兵  
敗還孚遠尋沒於臺據此則閻公之沒當在順治庚子辛  
丑故云廿餘年也令素之名與本末俟攷

又按自定彙作合素偶檢沅湘耆舊集唐躬園端笏小傳  
後增錄有徐令素唐躬園墓志疑卽是一人而以徐籍隸  
華亭唐躬園之沒在先生後十四年

詳弟十  
三卷

何以令素爲

誌其墓繹本文有滇師抗命之年章公子有謨游船山之  
門旦夕與躬園偕知躬園甚深因嘗爲余言躬園欲訪廬  
山云云則知令素與章載謀同爲華亭人嘗爲言躬園生

平故得志其墓

按載謀歸吳淞後與虎止常通音問則合躬固早沒其墓志卽載謀所代求也

字確係令字之譌今改正

劉思肯

劉思肯衡陽人

自定彙

六十自定彙乙卯年有走筆贈劉生思肯三首

七絕

七十自定彙己巳年有野史劉思肯惜十年之別來訪山中

爲畫衰容賦贈二首

七律

鼓棹初集有劉思肯畫史爲余畫小像雖不盡肖聊爲題之

鷓鴣天一首

正鈞按乙卯走筆贈劉生詩第一首云故園枝葉記君家

兄弟風流競筆花  
泛宅五湖君自遠  
相逢猶幸在長沙  
蓋思肯爲衡陽人以技出游  
乙卯先生避兵至長沙與之相  
遇  
第三首云老覺形容漸不眞  
鏡中人似夢中身  
憑君寫取千莖雪  
猶是先朝未老人  
則爾時已爲先生寫照而已  
已爲重寫矣  
自乙卯至己巳凡十五年  
詩題云十年之別者  
中間曾與相晤也

羅桐侯

羅桐侯石崖先生門人

七十自定稟

爵里埃攷

七十自定稟  
戊辰年有羅桐侯受業先兄存沒依軫倍於餘

子春初過慰衰老愴然酬贈一首

七律

正鈞按詩首二句云紙窗竹屋俯寒泉總角相看已蹉然  
蓋敘少小時事桐侯爲石崖先生門人先生時亦同硯席  
也次二句云莎徑情深尋帶艸蘆中恩重覆漁船必先年  
避兵時桐侯嘗有解阮之事後四句云重來棠社初悲雨  
老去桃花不計年一卷中公詩說在憑君珍重護秦煙則  
又追感今昔而以石崖先生詩傳合參付桐侯收藏也年  
譜劉氏毓崧以上年有贈邵陽羅若庸詩疑與桐侯卽是  
一人不知若庸名英號得我與羅從義均爲先生老友

詳說

第七卷

且上年之作與此詩詞意亦顯是兩人

李進士樸大

李樸大字爾雅永興人康熙戊辰進士因母老不仕以經學教授里中資脩脯以養有松溝閣集晚卜築義莊學者稱義莊先生義莊於衡陽二王爲年家子嘗爲石崖先生志墓集未見沅湘耆舊集小傳

李爾雅貞獻先生墓志

見石崖先生春秋四傳質篇首

云樸大以先生與先

君子同譜乙酉歲先生侍親卜隱敝邑以世誼隨薑齋隅坐而侍先君子嘗命執經於先生

薑齋詩分體稿丙寅年有便江李爾雅尊人震隅先生先君同譜執友乙酉夫之侍先君避兵於便館其宅上爾雅方垂髫同侍近乃通問山中爲先兄誌墓姪敝修謝因感懷寄訊

一首

七律

正鈞按乙酉爲順治二年據五十自定稿先生是年嘗與仲兄礅齋侍武夷先生避兵永興卽館其宅上丙寅爲康熙二十五年其時爾雅尙未成進士也

王文學祚隆

王祚隆字卜子一字一峯常甯人縣學生常主講嶽麓書院七年著有嶽麓詩草半山草長沙吟楚江吟諸集

沅湘耆舊集小傳

正鈞按耆舊集載卜子酬王薑齋先生詩云美人坐清湘聞吟復長嘯十旬五得飢體癯容愈少冠蓋時叩門千金不一笑道逢衣褐遊風雨憐同調因之得素心白日能相



照途長時亦艱出處各自劬攷先生甲午乙未間避地常甯主王文儼家卜子與之同邑或亦同族也

劉處士獻廷

劉獻廷字君賢一字繼莊順天大興人先世本吳人以官太醫遂家順天獻廷年十九復寓吳中其後居吳江者三十年晚更游楚尋復至吳垂老始北歸竟反吳卒焉崑山徐尙書下士多藏書大江南北老宿爭赴之獻廷游其間別有心得萬隱君季野最心折獻廷引參明史館事顧隱君景范黃隱君子鴻長於輿地亦引參一統志事獻廷謂諸公攷古有餘而未切實用及其歸也萬先生尤惜之獻廷當改步之時遭遇崑山兄弟而卒

老死於布衣又栖栖吳楚間漠不爲枌榆之念將無近於避人  
亡命者之所爲又其書獨不甚傳近始得見其廣陽雜記獻廷  
之學主於經世自象緯律厯以及邊塞關要財賦軍器之屬旁  
而釋道之書無不留心生平自謂於聲音之道足窮造化之奧  
嘗作新韻譜其悟自華嚴字母入而參之以天竺陀羅尼泰西  
蠟丁話小西天梵書暨天方蒙古女直等音又證之以遼人林  
益長之說法先立鼻音二以鼻音爲韻本有開有合各轉陰陽  
上去入之五音陰陽卽上下二平共十聲而不厯喉腭舌齒唇  
之七位故有橫轉無直送則等韻重疊之失去矣次定喉音四  
爲諸韻之宗而後知泰西蠟丁話女直國書梵音尙有未精者

以四者爲正喉音而從此得半音轉音伏音送音變喉音又以  
二鼻音分配之一爲東北韻宗一爲西南韻宗八韻立而四海  
之音可齊於是以喉音互相合凡得音十七喉音與鼻音互相  
合凡得音十又以有餘不盡者三合之凡得音共三十二音爲  
韻父而韻厯二十二位爲韻母橫轉各有五子而萬有不齊之  
聲攝於此矣又欲譜四方土音以窮宇宙元音之變取新韻譜  
爲主而以四方土音填之逢人便可印證蓋獻廷是書多得之  
大荒以外囊括浩博學者驟見或未能通也其論向來方輿書  
大抵詳於人事而於天地之故概未有聞當於疆域前添數則  
以諸方之北極出地爲主定簡平儀之度制爲正切線表而氣

節之後先日蝕之分杪五星之陵犯占驗可推矣諸方七十二  
候不同如嶺南之梅十月已開桃李臘月已開而吳下梅開於  
驚蟄桃李開於清明相去若此之殊今世所傳七十二候本諸  
月令乃七國時中原之氣候今之中原已與七國之中原不合  
則厯差爲之今於南北諸方細考其氣候詳載之爲一則則天  
地相應之變遷可求其微矣燕京吳下水皆東南流故必東南  
風而後雨衡湘水北流故必北風而後雨諸方山水之向背分  
合皆當按籍而列之而風土之剛柔暨陰陽燥溼之徵可以次  
第而求矣諸方有土音又有俚音蓋五行氣運所宣之不同各  
譜之爲一則合之土產則諸方人民性情風俗之微皆可推而

見矣其論水利謂西北乃二帝三王之舊都二千餘年未聞仰給於東南溝洫通而水利修也自劉石雲擾以訖金元千有餘年不暇遠慮不知水利爲何事故西北非無水有水不能用也有聖人者出經理天下必自西北水利始水利興而後足食教化可施也西北水利莫詳於水經酈注雖時移勢易十猶可得其六七酈氏略於東南人以此少之不知水道之當詳正在西北欲取二十一史關於水利農田戰守者各詳攷其所以埒以諸家之說以爲之疏以爲異日施行者之攷證又言聖王之治天下自宗法始無宗法天下不可得而治宜爲一書以發明之是則儒者之至言而惜其書亦未就吳江徵士沈彤爲獻廷立

傳不甚詳蓋其人蹤迹非尋常游士所閱歷似有所諱而不令人知予揣其人之不凡而終未悉其生平行事乃據廣陽雜記爲高弟黃宗夏所輯者求得其概爲撮拾而傳之

全祖望歸琦亭集劉繼莊

廣陽雜記

卷二

云王而農先生住查江在衡州府西南約九十

餘里而農諱夫之衡陽縣人壬午舉人與兄介之弟參之皆爲時所推重而農先生於壬申歲年已八十矣隱居山中未嘗入城市其學無所不窺於六經皆有發明洞庭之南天地元氣聖賢學脈僅此一綫耳

全氏祖望自跋此傳云繼莊返吳不久而卒其書星椹平生

所講學之友嚴事者曰梁溪顧昉滋衡陽王而棻而所心服者曰彭躬庵以予觀之躬庵尙平實而繼莊之恢張殆有過之惜乎不得盡見其書以知其人更二三十年直泯沒矣

正鈞按全氏傳僅據廣陽雜記及所聞於萬先生者爲傳廣陽雜記爲其門人黃宗夏所輯多記滇粵臺灣兵事表章當日遺老如不及蓋繼莊之志隱矣近吳縣潘氏重刻雜記足本校以丁泳之本增入北平王氏源墓表於繼莊本末益詳

劉處士諱獻廷字繼莊別號廣陽子大興人生於戊子七月二十六日年四十有八卒於吳歲在乙亥七月六日與妻張氏合葬於吳之陸墓山祖某其父鑛爲名醫母張氏吳氏相傳其先爲吳人會祖以上俱無攷處士穎悟絕人博覽有大志不仕不爲詞章之學年十九親沒挈家而南隱於吳初吳有高僧說法士人陳金

從之謹法華處士聞之與焉坐食頃伏几而酌曾說罷處  
士勦亦罷明日復往如故眾竊笑曾詰曰客何爲者呼與  
語則大驚拜伏地曰公神人也按登座處士夷然登座不  
讓暢衍厥旨眾大說僧率眾蒲伏願爲弟子處士笑曰吾  
正若誤耳豈爲浮屠學者哉拂衣去由是從游者日衆皆  
爲學者曰聖人謂人爲天地之心人形焉爾且衆材爲天  
地之心者學易而得其說乾也坤也初交而生風雷無形  
也水火次之形而虛山澤又次之實矣由是艸木生焉鳥  
獸育焉艸木鳥獸不已章乎未竟也艸木不實則艸木之  
生未竟而艸木熄天不章乎未竟也艸木不實則艸木之  
熄人者天地之實也故曰人爲天地之心身豈心哉心小  
爾所謂仁也天地不能爲者人爲之剝復否泰存乎運而  
轉迤之者心人苟不能幹旋氣運徒以其知能爲一身家  
之謀則不得謂之人何足爲天地之心哉故處士生平志  
在利濟天下後世造就人才而身家非所計其挈家而南  
也尚有資數千金以交游濟危難散去鄰舍一女子許字  
夫貧流於外母將改聘之女誓不從處士聞之惻然時僅  
餘藥肆一屢立鬻金尋其夫贈使婚娶而家益貧久之西  
南大亂民惶惑不聊生處士乃入洞庭山學益力亂定妻  
張氏旋卒於是慨然欲徧歷九州覽其山川形勢訪遺佚



交其豪杰博采軼事以廣其見聞而質證其所學初故尙  
書徐健庵及弟故大學士立齋兩先生聘之不就至是歸  
里將付其子嬰於兄御史賓廷徐又聘之乃就而子以修  
明史亦館於徐與處士道同志合日討論天地陰陽之變  
伯王大略兵法文章典制古今興亡之故方域要害近代  
人才邪正其意見之同猶聲赴響而處士於禮樂象緯醫  
藥書數法律農桑火攻器製傍通博攷括浩無涯涘嘗從  
容謂余曰吾志若不就他無所顧但願先子死耳子驚問  
故曰吾平生知已舍子其誰得子爲吾傳以傳復何恨哉  
嗚呼生歟死無闕於天下不足爲千古之士苦處士者其生其死  
與古人爭雄長亦不足爲千古之士苦處士者其生其死  
固世運消長所關而上下千年中不數見之人也顧留  
京師四年有奇遇而訖不見用庚午復至吳遂南游衡嶽  
因而歸方謀與同志結茅著書終老乃不一年死矣處士  
爲人良易負絕世之學而虛衷常自下誨人諄諄不少倦  
其少也讀書每竟夜不臥父母禁不與膏火則然香代之  
因眇一目又折其左肱落落攝敝衣冠躑躅風塵中人無  
敢易之者蓋其心廓然大公以天下爲已任使得志行乎  
時建立當不在三代下而竟溘然資志以死也豈不悲乎  
死之日門弟子哀號擗踊不欲生行路咨嗟涕洟子在京

聞之驚痛欲絕召其子變於天津與友人歛金爲位哭之而使變奔喪於吳未幾遂得吉壤以葬子不及銘其塋已卯正月過吳始一拜其墓而流涕爲之表嗚呼處士之心天地所以不熄之心也古聖賢以其心傳於後而古聖賢未嘗死天下有以處士之心爲心者處士又豈死哉後之覽者尙其有感而興焉墓表言庚午復

至吳遂南游衡嶽今攷廣陽雜記紀游嶽事甚悉中有云

余久滯衡陽又云壬申之春余與梁質人遇於星沙則先

生以壬申正月卒繼莊尙在湖南聞知也

據雜記稱諱某

但先生

歿年七十四雜記云八十稍誤雜記又詳載修侯先生及

磴齋先生事蓋當時晉謁山中歛聞之先生僻處窮荒外

間知者甚尠繼莊獨推重如此蓋有以深知先生矣黃宗

夏名曰瑚

曾處士致文

曾致文邵陽人孝友端方好讀書不求苟合當時衡陽王夫之

甚重其行

邵陽縣志政學甯朝柱傳

曾太母申孺人壽序

蓋齊逸文

云曾子致文爲其母七秩雍雍抱

尚德之心冀勿泯慈天之幽懿屬子立言以求不墜

曾氏族譜序

蓋齊逸文

云致文之子萬英姪萬芸從敵子游敵嘗

授以予之禮注而俾學焉

芸者古文

先生孫生荃信芳著

邵陽曾氏譜序云曾氏之里綴基布先

大父船山先生亟稱之曰邵之風醕古而曾氏爲其冠先船

山貞忠絕世獨許可於曾氏 又云其爲先大父船山所登

進者有處士凌如君致文君之謹敕焉

正鈞按曾氏譜序及申孺人壽序致文當是其字縣志似未及詳也

曾陵如萬年

曾陵如萬年邵陽人

邵陽縣志選舉表

正鈞按芸者古文稱凌如君因檢唐鳳德邵陽縣志選舉表封廕有曾陵如以孫榮銓官贈文林郎懷慶府陽武縣知縣知卽是一人而疑陵如非卽其名因攷寶慶府志氏族表太平曾氏有萬年贈文林郎邵陽新志選舉表有曾萬年以孫榮銓知縣地贈文林郎乃知陵如確名萬年而

唐志誤以字爲名也

船山師友記第十三

湘潭羅正鈞纂

管永敘

管永敘衡陽人中書舍人嗣裘之子從學先生早逝

五十自定稿

五十自定稿辛丑年有哀管生永敘一首

五排

正鈞按劉氏毓崧曰按詩云落葉風喧夕啼鷗柏冷霜如  
何悼亡客還有喪予傷蓋秋末所作也又云岳徑雲藏雪  
洋泉月引涼洋泉卽洋山之泉洋山在常甯蓋先生由常  
甯還南嶽永敘皆相隨也又云紫囊悲太傅湘帙冷中郎  
春穀江流遠南雲塞路荒人情誰劍挂天道豈弓張交絕

憐東里狂歌問子桑貢生空委珮鮑叔未分糧蓋永敘係  
冶仲之子弓伯之姪詩以太傅比弓伯中郎比冶仲春穀  
南雲謂冶仲卒於南荒猶嗣貢生委佩用貢禹彈冠事蓋  
先生與冶仲同起兵同授職也按劉說頗核但先生戊子  
同管冶仲赴行在冶仲留授中書先生旋復返楚未嘗與  
同授職故用貢禹事據分體彙廣哀詩注冶仲以甲午沒  
於永定州則永敘沒時冶仲尙在粵西莫卜存亡詳上弟三卷  
故云南雲塞路荒也篇首明有喪予之句又有云帶艸先  
摧綠傳燈獨秉光思深千里駕望屬百夫良則其從學先  
生無疑

羅仲宣瑄

羅瑄字仲宣邵陽人其先本爚下族再遷居邵之鐵塘代有聞人父從義遺民瑄有夙慧從義絕愛之弱冠餽於學再試舉人不售卽絕意進取以文史自娛經書多手寫性篤孝父病啜不粒食畜牝羊五更起親取其乳以進父病以瘳事繼母尤以純孝稱恭兄友弟根於至性藹然仁孝人也年六十五卒鄉人私諡曰孝懿衡陽鄒致肅志其墓稱孝懿先生

寶慶府志朝儒宿傳國

寶慶府志遷客王夫之傳云居邵陽中鄉主羅從義家最久教其子瑄成名宿

又流寓王政傳云王政幼隨其父避

亂客邵陽中鄉主羅從義家夫之卒故館中鄉最久與從義



族人英及其子瑄友善以文章氣節相砥礪

莊子解平原董思凝序云先生著述等身然頗散軼其子啟  
與其鄉後進甯子紹緒羅子仲宣梓其莊子解以公之同好  
余耳其名舊矣行部於此訪其遺書啟遂以此刻見授

正鈞按虎止生於順治十三年丙申其時先生寓居常甯  
此云幼隨其父客邵陽蓋先生去常甯後又常居邵仲宣  
從學當在爾時莊子解董序作於康熙己丑去先生之沒  
甫九年紹緒於他書無攷以仲宣邵人推之當與甯六肇  
一家也

又按武夷先生行狀啟文二長許字邵陽文學羅珪子智

大今攷寶慶府志邵陽氏族表四鐵塘羅氏從義子瑄外  
有名玠者皆從王旁瑄下行有智庶智釐皆聯智爲名據  
此則珪當係瑄之昆弟也

章載謀有謨

章有謨字載謀華亭人生平力學探古不應有司試寓衡山從  
王船山先生游訓以學禮歸名其齋曰景船著禮記說約三十  
卷今佚存者景船齋雜記二卷

章德聚景船  
齋雜記序

行狀云時值華亭章司馬次子有謨南遊阻道府君延入晝  
共食蘇夜共然藜以所注禮記授之夜談至雞鳴爲常遊兵  
之爲盜者竊聽而異之相戒無犯焉

小腆紀傳章曠傳云子有謨字載謀孤露無所歸衡陽王夫  
之招之同居雙髻山飯糗然脂三年學成爲夫之高弟子焉  
薑齋詩編年稟乙卯年有與李緩山章載謀同登迴雁峯次

緩山韻一首

七律

六十自定稟丙辰年有春夕同章載謀看月一首

七律

丁

巳年有新秋望章載謀二首

五律

己未年有避亂石雞邨

同載謀小憇四首

五絕

送章載謀歸吳淞二首

五律

正鈞按鄧氏顯鶴云按載謀爲永歷時兵部侍郎曠之子  
侍郎沒於永州載謀孤露貧匱無所歸先生時寓雙髻峯  
招與同居三年又徐令素唐躬園墓志云滇師抗命之年

章公子載謀有謨遊粵西不得歸因遊於船山之門而問  
禮按此二說與行狀所云皆合惟編年彙詩隸於乙卯送  
載謀歸吳淞在己未則載謀從先生游首尾五年鄧氏云  
三年者小誤

又按先生壬午得舉出歐陽方然門時章文毅曠爲分攷  
出場引爲知己後文毅守湘陰先生曾走湘陰上書勸其  
和南北後哭文毅各詩屢及之則當日先生與文毅相知  
甚深宜於其子尤加軫恤焉按耆舊集載虎止詩有寄章  
公子載謀五律一首又贈董君達詩題云董君年八十矣  
達來示以載謀公子及公孫近札

按景船齋雜記序云公於乾隆丙辰贈利津縣

令又云王成叔父紹庭公自利津解組歸以此則先生沒  
書授榮則所云公孫當卽紹庭爲載謀之子也後載謀猶常通音問六十自定稿新秋望載謀詩一聯云  
周秦焚後字荆楚望中樓自注禮注方竟則雜記序云授  
以禮注者致確景船齋雜記近上海有刻本所載多淞郡  
明季雜事無有及於師門者蓋授受心源悉具禮記說約  
中而此編出於隨筆也

唐如心克恕

唐克恕字如心衡陽諸生從船山先生游十餘載淡情進取不  
事帖括喜吟咏與人推誠相待士多樂出其門常自號一竿生  
箸一竿生傳以見志鄆縣周令公士儀贈以詩云一竿隨處釣

湘波一葉隨波穩穩過澤畔清歌誰鼓柂江門舊侶有藤蓑滄  
茫莫問沈江鎖雷雨應防挂壁梭萬古溪山長不改看來風月  
欲如何晚尤好學讀書樓上常數月足不履地箸有竹閣編嶽  
行草龍潭定舊及續小學廣輿記家範諸書

一竿生詩  
鈔本小傳

武夷先生行狀云教子一范聘文學唐克恕女

唐鳳儀傳

萬齋  
逸文

云萬厯間鄉先輩唐翔雲先生躬涵靜德爲

郡典型未百年而知者不數數也先生之孫克恕曾孫端笏  
拜請傳其略

遺響亭記

蓋齋  
逸文

云鄉先輩翔雲唐翁者當隆萬之昌期志關

閩之絕學翁孫如心氏祥氣生文仁原漱潤靜如止水尤溯

念於清淵緒以暄風固遙依乎黍谷

衡陽縣志唐鳳儀傳云克恕須竹游二王之門若竹林二阮

焉

須竹名端笏唐欽文子見下

七十自定癸庚申年有唐如心見過二首

七律

甲子年有

五日前一夕唐如心以近詩見問病廢夜讀久矣卽夕口占

寄意一首

七律

正鈞按如心爲唐欽文從兄弟欽文與先生交好

見弟故九卷

與其二子均游先生門衡陽縣志唐鳳儀傳又云端笏早卒以遺文託克恕今散佚矣按今唐一竿生詩鈔本有乙酉古遺姪新逝躬園姪復病且垂危以生平文豪屬爲收

藏退而誌哀七律一首蓋爲縣志所本但乙酉爲康熙十

四年先生以三十一年歿躬園尙存

詳下則不得云早卒也

鈔本又有癸未五十酬諸戚友詩七律一首

癸未爲康熙四十二年

以先生壬申沒年七十四推之如心蓋少於先生三十六  
歲唐欽文沒於康熙己未故自定稟庚申唐如心見過詩  
有知君問禮當深夜急難原頭感脊令之語虎止旣與如  
心締爲婚媾耆舊集載虎止詩有夏杪過擷翠堂贈主人  
唐如心五律二首客如心擷翠堂三載冬盡留別五律二  
首數詩可想見兩家之交誼矣

又按芸者古文有代某水園王次附墓志銘一首中有云



從吾世兄蕉畦王子游而上窺吾師船山先生之學云云  
則倩代者必係先生門人今按一竿生詩鈔本正有九日  
同王虎止過王次附七律一首則生若所代者未知卽如  
心否也

### 唐古遺端典

唐端典字古遺衡陽處士克峻之子

逸文唐欽文墓志  
六十自定集

唐欽文墓志云惟延宿學教三子成文章爲當代文學最用  
守翔雲之舊德至於庭訓有秩述先進之風勸戒之于涓罷  
虛淡則翁提撕申警獨伸己意開一令折衷於余之不敏不  
欲莠言之相間故翁子有請事絕學之志皆翁所密授然也

六十自定纂癸丑年有新秋同唐古遺須竹遊鍾武故城歸

坐小軒夜語四首

七絕

正鈞按遊鍾武故城詩第三首有云但爲愛君兄弟好欵  
眠閑看綠光晴又逸文唐欽文妻蘇氏孝壽說云唐子古  
遺與其弟須竹以其母氏蘇孺人六喪請言於王子知古  
遺爲須竹之兄欽文墓志有云嗣子端典端笏以志銘請  
知古遺卽名端典墓志云教三子成文章按三子一名端  
紳字義臣先生  
逸文有唐  
義臣墓志又云一折衷余之不敏則古遺固偕弟須竹游  
先生之門也

唐須竹端笏

唐端笏字須竹一字躬園衡陽人明季諸生性至孝父母有疾侍醫藥終夜不解帶親終附身附棺纖毫不苟以此見賞於王夫之嘗得白沙集定山集傳習錄讀之而嗜迎夫之佳馭閣巖爲剖析源流知後來心學之謬夫之示以思問錄內外編周易內外傳其名屢見船山集中蓋船山受業弟子中所倚爲奔走後先者也夫之沒築室山中以終所著有慚說悔說

沅湘耆舊集小傳

小腆紀傳

唐我臣墓志

蓋齋逸文

云歲乙巳夏抱疴荒徑不聞人語者五十

日唐子須竹投一畱以問交余謝病未遑也間歲丙午須竹踏新雨而至歡然相得之晚

孝壽說自跋

薑齋逸文

云余以世誼得盡悉其內行故入林以來

二十餘年如黃楊逢閏筆舌盡縮而一再爲之引伸不能自  
休直以須竹之數相與游也

躬園說

薑齋逸文

序云須竹將爲園于承武二水之湄以讀書而

名之躬園請予爲之說

惜餘髮賦自跋

薑齋逸文

云甲寅春閱躬園之志長言以達其幽

緒而廣之歷時已夙物變益淪余旣將揮手謝躬園返於冥  
漠銜情永夜孰與言者躬園亦孰復與言者書之縑素留人  
問世此理此心不以□□□□滅他日□□靜對如鍾武城  
西歔歔慰藉僕以□矣辛未伏日王夫之記并書 又云

書賦已念余爲躬園言情躬園亦應爲我言情無容徒勞閔  
默雖然余情何足言者歷四十五年馬齒七十有三粥飯在  
孟阿誰操匕箸引之入口是何國秭秭余情何足言者

老子衍序跋云閱十八年王子重定於觀生居明年友人唐  
端笏須竹攜歸其家會不戒於火遂無副本更五年戊午男  
敬出所藏舊本施乙注者不忍弃之復錄此王子稿有後序  
參魏明陽張平叔之說亡之矣上巳日湘西艸堂記

逸詩祝躬園百韻跋雲端笏字須竹一字躬園從王船山先  
生游二十餘載著有讀史要言十三經解共二百餘卷惜爲  
兵火所焚十失其九己未長至日端笏爲園于蒸武二水之

湄讀書名之曰躬園船山贈此詩爲祝

按此跋當是後人所補述

六十自定棄戊申年有與唐須竹夜語二首

律五

己酉年

有同唐須竹遊馭閣巖一首

律七

昭陽庵同須竹夜語云乘木

葉秋波探五老之勝因便送之一首

律七

讀涇陽先生虞山書

院語錄示唐須竹二首

律七

癸未年有咏菊答須竹一首

排五

甲寅年有舟中上巳同須竹一首

律五

青艸湖風泊同

唐須竹與黃生看遠汀落雁一首

排五

舊齋編年稟辛亥年有月坐懷須竹南嶽一首

占五

庚申

年有送須竹之長沙二首

律七

壬戌年有懷須竹一首

律七

柳岸吟有爲躬園題用念庵韻二首 示唐須竹一首

逸詩有贈躬園百韻一首

五古

和唐端笏默坐天籟靜坐四首

五古

同唐須竹遊晏坐馭閣巖因而有作一首

五古

鼓棹初集有待須竹謁金門一首 二集有答須竹所問一

翦梅一首

正鈞按須竹以康熙五年丙午見先生逸詩躬園百韻有

云君生我弱冠荏苒雪霜髭則其來游門下年甫踰冠也

其從游本末略具耆舊集所載徐令素唐躬園墓志銘

按墓

志銘云躬園諱端笏字須竹至性人也孝於其親服勤色養父母有疾朝夕不解帶藥與淚俱進奉醫如俗士之奉長吏終兩親喪號踊切摯弔者俱為感泣求蜀材庀岳絹皆親鬻以歸製為送終之具旦夕與匠者偕多懼其略也築塋之法匠心而得堅緻之方廬墓月餘方成復月餘俟其固始歸而終制以此為廬山先生所知賞溲師抗命之

年章公子載謀有謨遊粵西不得歸因游于船山之門而問禮躬園旦夕與借知躬園甚深嘗爲余言躬園欲訪廬山求安成陳二止先生觀歐陽懷雲先生霖宗事之船山先生許焉以父病不果行又極九老人以書訂船山同住青原船山不欲往遣躬園行達彼此之意又以母病不果行嘗得白沙集定山集傳習錄諸書讀之而嗜迎船山先生住馭閣巖爲剖析源流因知有朱陸同異及後來心學之謬船山示以思問錄內外編及柳岸吟周易內外傳諸書先生長逝後築室山中以繹所學所著慨說悔說其言悲其志固卓乎遠也 按徐令素華亭人說詳第十一卷自丙午至先生壬申之沒二十六年躬園百韻跋所述從游年歲正相符合

又按先生與須竹贈酬之作除上所引外自定稟壬子年劉庶仙五十初度詩題云卽席同唐須竹弟二首末句云華山噉取墜驢客共說當年行路難自注端笏來適墜驢



按今自定彙遺此注  
茲從唐氏鈔本錄出  
癸未哭李雨蒼詩題云得唐須竹鄂

諸信弟六首云白楊衰艸楚雲天孺子生芻蕘暝煙自注

須竹赴哭未歸戊午年送李芋巖歸芝詩題云同須竹弟

二首末句云不是躬園相識久孤山錯擬萬株梅分體彙

廣哀詩熊文學策一首有云生死四十秋奉此爲津筏欲

語人不聞時語唐端笏而石崖先生逸詩亦有祝唐端笏

初度三首

按詩云泉清石皓皓遠谷宜幽艸野人聿旣耄  
落落鮮紅編爲幕管鮑交投分君家早次首云

早歲識太邱邂逅足千秋不知桑與海班荆及白頭季方

尋世好起子益髦修悠悠翻覆手古道于君留三首云世

路日以新君獨問古津修容于火滅恂恂葆其真下榻君

入座微言飲我醕行己介夷惠棊書在渭莘韶年方強仕

善價應昌辰何以視純嘏萊衣歲歲春  
按石合諸說以

崖先生詩不多見茲從唐氏鈔本錄出存之

觀則躬園當日親炙門牆二十餘年依依几杖雖其術業  
今不盡傳而其相期之切相契之微猶令人想像於不容  
已蓋有不恃夫文字之迹者存也

又按沅湘耆舊集有躬園荷葉塘道中望紫荊峯五古一  
首詩云嶽氣息空明嶽情未中已片碧浮西清金翠相紛  
詭落日溜珠光徘徊動雲髓閱爲開士宅靈蹟恣法喜靜  
妙自孤筌喧動違物始如何三年終奔情失內美獨語無  
與酬遙心託寒水鄧氏顯鶴云須竹詩境雅潔惜不多見  
蓋亦吉光片羽之僅存者又按耆舊集載虎止詩有吳興  
季翁簡尤垂弔先大人瑩遂約共游燕趙唐躬園力爲阻

行有作述懷一首其詩云了了蔚莪生悠悠風波目白髮  
已盈顛紅塵日銷骨眷言思遠道有客勞存錄慰我煢影  
孤貽余蘭珮馥爲言燕趙士慷慨相追逐胡爲守荒林寒  
烟困空谷長劍宜有贈囊椎焉可禿且作連騎游勿爲握  
粟卜老友貽書來君行胡太速先人留遺書大命曾申囑  
未解卜升沈當先念傾覆兀坐望飛鴻遙心虛遠屬據此  
則躬園之識量亦可想見其一端矣

戴晉元日煥

戴日煥字晉元衡山諸生家世饒財明季蕩於寇年逾冠尙未  
就傅時避兵嶽寺貧不能具膏火夜執書就佛燈讀遂通五經

及諸子尤邃於易後遊船山之門所造益深博

沅湘耆舊集小傳

薑齋詩賸稟丙辰歲有戊戌嶽後辱戴晉元見訪今來復連

榻旃壇口占一首

五古

七十自定稟甲子年有代書寄衡山戴晉元二首

七絕

正鈞按賸稟一詩則晉元始謁在戊戌下距丙辰首尾相隔已十八年故詩有荏苒十八年夢中時一遇之語甲子代書詩第二首有云聞說茂陵方病渴莫修封禪數行書耆舊集鄧氏顯鶴云船山集中有代書寄戴晉元詩蓋規之也晉元年八十時舉子九十方卒

蕭文學子石

蕭子石以字行衡陽諸生遭明季兵燹後家無完書授敝簪敗  
簡得其奧義嘗游王夫之鄒統魯李國相之門求性理宗旨著  
有戴記說杏園詩集秉性沖淡而風骨凝然待朋友生死不二  
卒年六十有七

衡陽縣志

衡陽新志宋之素傳云國初縣諸生以樸學稱者有蕭子石  
陳賡治胡興耘唐光大子石學於王夫之受禮記義疏

### 蒙之鴻

蒙之鴻衡山歲貢父正發崇陽人寓衡陽南鄉之斗嶺沒後子  
孫歸崇陽惟之鴻以長子留守墓從王夫之學所造頗深著有  
遣心集詩彙教授鄉塾與夫之子敢唱酬甚多

湖南通志流寓  
邵陽縣志流寓

正鈞按薑齋詩分體彙甲子年有五日同劉蒙兩生小飲  
五律一首所稱蒙生當卽之鴻蒙聖功沒於己未詳弟廣  
哀詩述其孤尙幼甲子上此己未六年通志流寓傳述之  
鴻爲長子則其時已游門下也

又按莊子解虎止增注逍遙遊篇引有蒙之鴻說一條之  
鴻於莊子當箸有成書也

### 王 灝

王灝衡陽附貢生康熙初官長沙府學訓導

衡陽縣志  
選舉表

正鈞按莊子解虎止刻本卷首有門人王灝序

曾學博臣

曾岳字埏耶邵陽人父光祚遺民岳有才識好學能文喜結納  
早歲見稱于衡陽王夫之岳曾及其門故所見益卓康熙丙寅  
拔貢官麻陽教諭其在太學最有名譽敘其先世言行求名人  
傳志以不任表章爲己罪一時公卿多禮下之寶慶府志  
文學傳  
芸者古文曾氏譜序云其爲先大父船山所登進者有巴東  
掌故埏耶君麻陽掌故蕃祉君之淹雅焉

曾學博萬芳

曾萬芳字蕃祉邵陽人康熙壬戌歲貢官巴東訓導

寶慶府志  
氏族表

正鈞按府志曾岳傳云官麻陽教諭而芸者古文則埏耶  
係官巴東官麻陽者爲蕃祉考府志氏族表太平曾氏則

有萬芳官巴東訓導蓋卽蕃祉之名而信芳記憶之譌也

劉永治

劉永治邵陽人

武夷先生行狀

正鈞按武夷先生行狀篇末書門下後學邵陽劉永治填  
諱行狀作於癸亥按七十自定彙辛酉年有中秋向夕自  
觀生居同劉生小步歸艸堂月上五律二首分體彙甲子  
有五日同劉蒙二生小飲五律一首此劉生當是門人之  
列詩皆作於前後兩年未知卽否永治

劉存孺

劉存孺

見鼓棹集



鼓棹二集有問劉存孺索香橙清平樂一首

正鈞按存孺名與爵里無攷薑齋分體彙癸亥年有九日  
同熊男公與中涵存孺于禮集二如精舍二首又七十自  
定彙甲子年有待于禮一首丁卯年有倣李鄴侯詳弟中歌廣其意示于禮一首熊男公爲先生老友八卷于  
禮之姓名無攷似與存孺均在門人之列而晚歲詩彙中  
稱諸子者屢見惜皆無由得其姓名又虎止所刻書校人  
姓名莊子解有王天泰題後學張子正蒙有劉高美王天  
履熊成章稱私淑門人附識於此

船山師友記第十四

湘潭羅正鈞纂

鄭忝生興祖

鄭興祖字忝生襄陽人吏部尙書繼之之從孫爲先生妻弟從

先生學成文章卒于庚子

薑齋詩分體  
稟廣哀詩注

五十自定稟庚子年有哭內弟鄭忝生一首

七古

薑齋詩分體稟廣哀詩第十一有鄭生興祖一首

自注見上  
五古

正鈞按廣哀詩注云爲予內弟先生繼配鄭氏五十自定

稟來時路五古三首自注云悼亡男故跋云此先君子輓

先妣鄭孺人之詩外祖父文學公諱儀珂字履聲宗伯公

鳴峴先生諱繼之之孫

按七卿表繼之官終於家譜載史部尙書稱宗伯蓋誤

元配陶孺人以丙戌歿明年丁亥丁武夷先生憂旋卽從

王嶺外以庚寅服闋補官詳白定案辛丑續哀兩詩序云

庚寅冬幽困永福水砦亡室乃與余謀聞道歸楚亡室當

指鄭孺人故鄧氏顯鶴謂鄭孺人以庚寅歸先生于桂林

見耆舊集跋先生來時路詩

今觀哭忝生詩亦有與君相逢八桂城之

語則云歸于桂林者甚確但是年先生以正月在桂林服

闋卽扈蹕至梧州

爭詔獄爲二月事可證

推之鄭孺人來歸當是七

月去官以後八月至桂林之時

年譜定鄭孺人來歸在正月蓋誤

據廣哀

詩云寒雲凝席帽扶攜反幽谷殘書久零亂綴拾授爾讀

則間道歸楚時忝生卽已相依而庚寅至庚子十有一年  
轉徙山谷亦常相隨受讀也

李治尹嚮明

李嚮明字治尹衡陽人文學報瓊之子

武夷先生行狀分體彙

薑齋詩分體彙癸亥年有治尹始春爲邵陽游有贈一首律  
鼓棹初集有與李治尹夜語致身錄事有感而作踏莎行一  
首

正鈞按治尹分體彙及鼓棹集均未著其名攷武夷先生  
行狀云夫之側室女一適文學李報瓊子嚮明蓋取易嚮  
明而治之誼名嚮明字治尹也又七十自定彙辛酉有示

劉李二生五律二首鼓棹二集有攤破浣溪沙病中與劉  
李二生夜語一首所稱李生當卽治尹而以子倩執經門  
下也

劉輯夏法忠

劉法忠字輯夏衡陽人兵部尙書堯誨之曾孫

武夷先生行狀  
七十自定藁

七十自定藁乙丑年有送劉生輯夏歸省重慶一首

絕

正鈞按詩云蒸江漱玉繞蒼汀玳瑁霜雲擁翠屏歸向湘  
山高頂望應瞻南極老人星據南極老人語重慶應卽重  
闕攷武夷先生行狀云攷女二長適兵部尙書劉堯誨孫  
克謹子法忠以夏尙忠之誼推之法忠當卽輯夏之名又

按劉堯誨臨武人嘉靖癸丑進士累官兵部尙書罷官寓居衡陽其後遂爲衡陽人

熊體貞時幹

熊時幹字體貞衡陽人文學榮祀之子

武夷先生行狀  
柳岸吟

柳岸吟有讀易贈熊體貞孫倩八首

四言

正鈞按體貞一見柳岸吟攷薑齋逸文武夷先生行狀云  
敎女二次適文學熊榮祀子時幹則知體貞名時幹也柳  
岸吟詩爲門人講學時所作讀易八首詞意獨爲深至體  
貞時居門下學易其所得亦可想見矣

王幼重敏

王敏字幼重牧石先生之孫

牧石先生墓表

蓋齋逸文尺牘有與幼重二首

七十自定藁丁卯年有姪敏五十一首

七律

正鈞按幼重爲牧石先生孫從兄王之之子

詳

虎止先生

家譜序云遘壬申正月之閏幼重兄共廬墓左特以表槩相授云弟必成此書以俾敏告無罪於先人尺牘中亦皆懇至之語則羣從中先生於幼重尤所愛重者矣

王撫原敏

王敏字撫原貞獻先生介之冢嗣十五補邑文學爲文清通醇正詩得陶謝風旨讀書刻意以求物理天則之蘊貞獻先生達

世守貞儆躬耕授徒以侍麾之遠愈不忍離篝火具沐廁厠汎除之勞髣髴半白矣响响如孺子執勞不倦如是者三十餘年貞獻年八十卒儆啼號不絕于口閱數月以毀卒年五十有七

文集  
原墓志

武夷先生行狀介之子一儆乙酉補邑文學

撫原氏墓志銘

蓋齋  
文集

云幼從余學學於余者篤志精研未有

及之者也余於其亡哀之不欲生而又重悼其銜恤以隕生父沒而不能一日存於世也

自跋武夷先生行狀

逸文

云夫之謹狀如右越四年丙寅介之

侍先君於幽壤介之子儆以愚樸略誌而登之石未幾儆



以哭父死戊辰冬始藏誌石于嶽阡之隧前

五十自定橐丙辰年有春盡從子敞寄山居雪咏絕句款爾

隔歲聊復知之二首

七絕

七十自定橐丙辰年有爲家兄作傳略已示從子敞一首

五律

正鈞按乙酉福王建號南都稱宏光元年

又按先生兄弟三人據武夷先生行狀石崖先生子一敞

鏗齋先生子二敕致皆天家世節錄云敕以孝隕於難致

早夭五十自定橐甲午哀從子敕詩題云從子敕遭閔以

後與子共命而潛者七年頃子竄身猺中不自以必生爲

謀敕因留侍伯兄時序未改避伏失據掠騎集其四維方

聞道往迎已羅鞠凶矣悲激之下時有哀吟草邇佚落僅存絕句二首又先生從兄三人節錄云仲父生玉之季父生珍之牧石先生墓表子二人釗之早卒玉之子五人格安國恬子偉敏敏已見前尺牘有與我文姪二首推許甚至未詳其名諸孫行著見者騰原氏墓志子二生祁生郊牧石先生墓表玉之有孫生祁生蔭生蔭爲敏之子見尺牘詩牘橐有示姪孫生蕃五古一首未知所出其詩詞意甚摯當非疏屬附注於此

### 王曷功攸

王攸字曷功衡陽人而農先生長子與弟敬齊名著有詩經釋

略詩不多見

沅湘耆舊小傳

己巳九月書授攷

薑齋逸文

云汝兄弟二人正如我兩足雖左右

異嚮正以相成而不相盤戾况本可無爭但以一往之氣遂各挾所懷相爲疑忌先人孝友之風墜則家必不長天下人無限逆者順者且付之無可如何而徒以兄弟一言不平一色不令必藏之宿之乎試俯首思之

柳岸吟有示兩子二首

七絕

五十自定棄甲辰年有五日攜攷兒同子直小飲分得端字

一首

七律

正鈞按耆舊集載曷功謁祖塋詩三首

按詩云小舟沿宿莽故岸記相尋風

雨杯前淚泉臺膝下心芸香隣蠹冷劍氣看苔侵弱羽悲  
鳴苦言愁早自瘖賢侯銘舊德祖志斷碑尋湘水前人帶  
嶽雲後嗣心市嵐山氣淡岸葦曉霜侵遺槩誰能茹來茲  
念我瘖生小從離亂荒邱近可尋碑存當日跡淚識邇時  
心馬鬣何年立松楸保勿侵題下注云丁巳冬同族眾婦  
死生無限感畢哭奈聲瘖  
東洲上塋并哭先孺人冢攷甫二歲而先孺人卒鄧氏顯  
鶴云先生元配陶孺人生攷甫二歲值家難以哀悸死病按  
枕憶得丁亥年仿杜少陵文文山七歌弟五首云有妻有  
妻哭父死恩恩棄葬埵如蟻則陶孺人蓋殉父萬梧翁之  
喪故像贊亦有按陶孺人卒於丙戌攷蓋以甲申生也  
孝而殉之語

王虎止敬

王敬字虎止衡陽人而農先生之次子康熙己亥歲貢生虎止  
稟承庭訓學問淵博操履高潔時藝尤有盛名年三十方應童

試與邵陽車無咎補旃王元復能愚攸縣陳之駉桃文稱楚南  
四家又有稱楚南三王者謂虎止與能愚及漢陽王戢伯穀也  
潘書原先生宗洛視學楚南時延之入幕襄校試卷與宜興儲  
大文六雅友善船山遺書得入史館立傳儒林皆潘儲左右之  
力也晚築湘西艸堂學者多從之游著有蕉畦字朔蕉畦存稟  
笈雲艸諸書學者稱蕉畦先生雍正庚戌聘修邑志力疾成數  
帙歸艸堂而卒

沅湘耆舊集小傳  
衡陽縣志本傳

自爲墓銘跋

菴齋逸文

云墓石可不作徇汝兄弟爲之此不可增

損一字行狀原爲請志銘而作既有銘不可贅若汝兄弟能  
老而好學可不以譽我者毀我數十年後略記以示後人可

耳勿庸問世也背此者自負其心

行狀云次年元旦尙衣冠謁家廟二日清晨起坐不憚指先祖行狀墓銘付長孫若曰汝慎藏之謂故曰勿爲吾立私諡也良久命整衾時方辰遂就簀正衾甫畢而逝享壽七十有四遺命禁用僧道

薑齋詩編年稟庚戌年有齒落示敬子一首

七絕

七十自定稟戊辰年有敬築土室授童子讀題曰蕉畦口占

示之四首

五絕

正鈞按虎止爲繼配鄭孺人所出以順治十三年丙申生

于常甯

詳弟十卷

先生沒後虎止重葺湘西艸堂作記時年七

十有五之增錄記文云先子船山記曰船山者吾山也故今  
堂也先子自崇禎癸未張獻忠陷衡後湘嶽之間三十餘  
年蒸幣踵至終全志節閉門著述迄歲庚子乃徙居于湘  
西之金蘭鄉卜舍于茱萸塘初造小室名之曰敗葉廬蓬  
檐竹牖植九木柱編篾爲壁次築觀生居在茱萸塘上易  
以茅堵窗櫺櫺少容几杖越十二年再徙于石船山下去  
觀生居二里許仍里人舊址築湘西艸堂因避滇氛泛宅  
數載後復歸艸堂定經詮秩散藁輯間吟迄壬申而先子  
奄肯歿僅固遺書于屋右今而火災蟻蝕之害其震驚恍  
惕者不一次也因聚徒課業于其中迄敵年六十從游者  
數十人醵金爲余壽余受其金授子皆會生重建艸堂易  
瓦以葺支椽以櫺鏤磚以砌故年老病羸以餘年讀遺書  
于其中而從游之有志迄姻友之有力者續捐貲刊先子  
遺書數種藏板于右閣故手植刺松側栢紅梅碧桃等樹  
成蔭篋簞園篁成林而艸堂益爲都里所共式逮敵年七  
十諸生復醵金如舊爲余刊小艸百篇小艸先後所爲時  
藝此不足傳而余不之卻亦以諸君始終培植艸堂之意  
不可忘也今敵七十有五矣盼新竹之娟娟而恐放其良  
心者亦如牛山之旦旦而召斧斤也拔毫爲文付諸子係

讀之者當如讀  
鳴鳩而三復也

正當雍正八年庚戌按芸者韻語有乙卯

元日過洪山堂省朱丈歸讀先子遺藁一詩乙卯爲雍正

十三年故信芳詩題先子年譜劉氏謂敵字虎止取義于

止樂之敵作伏虎之形虎屬于寅遂疑虎止生于庚寅鄭

孺人來歸之年謂至雍正八年年已八十一蓋未見衡陽

舊志故推測涉於埒會也又耆舊集載虎止感懷詩

詩云  
吾宗

發邗江奮武昭勳最嗣世申寵錫湘嶽盟帶礪武業中式  
微文心宏錫類穆惟我先公六經發蒙昧子史析微芒詩  
騷樹宏幟傳書待其人函井心無旣撫族慨凋零綠緯示  
苗裔洪源誰嗣流集木懷枝瘁吉人深屬望世代傳支系  
物恆守家訓誦讀培元氣四海皆弟兄恭禮實連綴一樹  
紫荆花忍使分榮悴孟晉以逮羣仁者繼其志徙倚瞻山  
雲臨風詳其詞意曷功蓋已前沒也



又按數藝齋文存與鄧湘皋書云而農先生卒後未十年  
虎止先生已刊行十餘種于湘西艸堂又年譜劉氏毓崧  
曰按張子正蒙注有虎止增注老子衍有虎止纂注莊子  
解有虎止增注此外彙本亦虎止輯錄者居多非獨謹守  
遺書不墜先緒也

又按家譜曷功子四人生若歲貢生生滋生蒼縣學生生  
蓮縣學生虎止子二人生范生荃縣學生行狀云指先祖  
行狀墓銘授長孫若曰汝慎藏之遺書刊船山家戒一帙  
後注云丙申長夏先人書授長慮墜失此帙如捐余愧慙  
孫男生若謹識沅湘耆舊集王秀才生荃小傳云字信芳

諸生著有芸者韻語芸者古文二帙矢音不多崛強生硬  
力避庸熟猶不失蕉畦家法曾孫十六人年譜劉氏云黃  
書稟本有長曾孫永緯編次之語莊子通稟本有長曾孫  
永緯星遠編次之語又六世孫承佐以孝友衡陽新舊志  
皆爲立傳據此則先生子孫皆賢孝能傳其家學也

船山師友記第十五

湘潭羅正鈞纂

釋茹蘗智需

智需字茹蘗昆明人本姓張以鄉舉任衡山令己未沒于嘉興

之楊墳

分體彙廣  
哀詩注

六十自定彙辛亥年有宿雪竹山同茹蘗大師夜語一首

七律

薑齋詩分體彙辛酉年廣哀詩第十六有雪竹山道者智需

一首

自注見上  
五古

正鈞按六十自定彙庚戌有懷入山所栖伏巖谷述以小  
詩得二十九首就中有雪竹山一首與桃塢茱萸塘等處

注云右湘西詩云楊墳一竿竹空外影千尋六月飛人雪  
埋心直到今全詩卽爲茹藥而作則雪竹山距先生艸堂  
不遠暇日輒相往還也

釋凝然性翰

性翰字凝然南嶽僧丙申年沒

蓮峯志分  
體豪詩注

蓮峯志沿革門云方廣寺崇禎戊辰火已卯督學使王公永  
祚澄川屬僧凝然性翰壬午學使高公世泰彙旃益命之性  
翰出其衣鉢資糧以隆武元年乙酉十一月十二日再造  
蓋齋分體豪辛酉年廣哀詩第十有南嶽僧性翰一首

自注  
見上

正鈞按廣哀詩有云疇昔天狼驕竄身潭龍吻緇流不相  
疑泥滓爲拭拔葢癸未甲申閒先生避難蓮峯凝然常爲  
調護又有云爲有神駿姿激揚忠憤隱行歌方亢爽社稷  
已齋粉燒燈相向悲坐待鐘聲殷義旗同崎嶇債敗無鬱  
菀垂死猶致聲心魂相合臆潭雲空淒迷回望增悲愍據  
此則先生戊子舉義兵凝然實同在行閒以方外而趨君  
父之急宜先生尤加愍悼也

釋悟一

悟一南嶽西明寺主僧

五十目  
定彙

五十自定彙壬辰年有過西明寺望早冲追懷悟一上人示

蒼枝慈智二首

按遺書作怡一今從年譜改正七絕

正鈞按年譜劉氏毓崧曰按詩中有重來春水之語故知重過西明寺在春閒其云冬葵滑熟係追敘前此以冬閒至寺據蓮峯志蓮花峯南洞油嶺有西明寺林泉曠異下可安步知西明寺在蓮花峯旁今攷癸未冬先生因張獻忠購捕紳士避於衡山蓮花峯下其飯于西明寺當在彼時至是年重過則悟一已沒故有慚姚千金無報之語蒼枝慈智其卽悟一之徒歟

釋慈枝

慈枝雙髻峯續夢庵主僧

病枕憶得

薑齋逸文贈釋惟印詩序云永厯丁亥春余居雙髻峯初晴  
方暄遍尋諸峯與慈枝上人聞惟公居羅漢臺欣然卜遊  
病枕憶得乙酉年有續夢庵拈岸側桃花示慈枝庵主一首  
絕七

正鈞按憶得上年甲申有將營續夢庵登雙髻峯半訪址  
五絕一首丁亥有元日續夢庵用袁石公韻七律二首又  
蓮峯志名遊門云堵公允錫問余兄弟匿迹處訪續夢庵  
欣然將登之據此則續夢庵在蓮花峯雙髻峯先生所自  
營造爲此三數年避兵常居之所而慈枝爲之庵主也

釋破門法智

法智字破門結茅南嶽下火場自名其庵曰石浪居衡二十餘  
年以詩自娛尤工艸書有破門詩集

沅湘耆舊  
集小傳

南窗漫記云僧詩本不足埒曹檜之末唐宋之名髡技止此  
耳況今日裁量止于其域大無能攝微無能入也以予所見  
者僧法智一絕云一步一花無別意香來薰透破袈裟差爲  
蔬筍之雄

病枕憶得丁亥年有石浪庵贈破門一首

七絕

正鈞按破門之名甚著劉繼莊廣陽雜記稱破門住南嶽  
飛來石船下書法深入晉唐間奧黃慎軒而後不可多得  
丁亥爲順治三年先生是年春出湘鄉歸省武夷先生返



衡也詳弟五卷

釋如滿

如滿南嶽僧

詩經釋疏

詩經稗疏卷二螟蛉有子果羸負之條下云夫之在南嶽有山僧如滿言其如此因導夫之自于紙卷中展看一一悉符陶段之說

正鈞按年譜劉氏毓崧注是條于己亥

順治十六年

仍居嶽後

雙髻峯下其說曰按在嶽係久居之語非偶至之詞先生前此居南嶽累年然是年最爲閒暇故所賦山居雜體如卦名縣名建除吃口之類多出戲筆南嶽摘茶詞亦從容

無事所作其體察螟蛉果羸似當卽在此時至下年逐居  
湘西後雖亦偶至南嶽然未必久居矣

釋先開

先開

見自定稟

七十自定稟癸亥年有先開逐丹桂于窗下作供爲賦十六

韻

五排

甲子年有先開過問病贈之一首

五律

正鈞按七十自定稟庚申有南天窩授竹影題用徐天池  
香煙韻七首第六首自注云時爲先開訂相宗并與諸子  
論莊攷船山遺書存目有相宗絡索三卷注未刻蓋卽爲  
先開所訂者劉氏毓崧云是書乃釋氏之小學紺珠先生

生平未嘗佞佛此特一時寄興一應先開之請耳

釋二如表

二如名表別峯庵主僧

七十白  
定彙

衡陽縣志山水第八云南天峯有別峯庵庵僧二如明末遺民也與王夫之友善夫之遯迹每相酬唱及死題像弔之詞語甚哀

七十自定彙戊辰年有別峯庵二如表長老類知予者對眾大言天下無和嶠之癖者唯船山一漢魏不克任而表師志趣于此徵矣就彼法中得坐脫其宜也詩以弔之一首

正鈞按七十自定彙癸亥年有寒雨歸自別峯庵寄同遊

諸子一詩分體彙丁卯年有宿別峯庵一詩又鼓棹初集  
有東風齊著力一首題係憶別峯修竹爲人雪摧折據此  
則別峯庵係先生所常游息之所二如葢庵中主僧故縣  
志云然也

釋萬峯知韜

知韜字舌劍一字萬峯衡陽人有詩文集三十卷

沅湘耆舊集小傳

寶甯寺志敘

葢齋逸文

云寶甯西南嶽東江西二莖之所自與石

霜雲葢相拱揖躋我萬峯和尚之拊松東嚮而捄除於榛莽  
之餘弗容已也

七十自定彙乙丑年有代書答舌劍韜一首

七律

菴齋分體橐丙寅年有萬峯韜長老寄書有不願成佛願見  
船山之語聞其長逝作此悼之一首

五律

正鈞按代書一詩首二句云泚水東流嶽阜西魚書遙問  
浣花溪按泚水源出鄆縣流經茶陵至攸縣與攸水合蓋  
是時舌劍寓寺所在據分體橐其沒卽在寄書之明年則  
寄書後終未得一見先生也

### 釋楚雲

釋楚雲明季遺老

衡陽縣志

衡陽縣志山水第二云天平庵僧楚雲明季遺老與王夫之  
往還酬贈篇什尤多

六  
正鈞按自定稟無與楚雲酬贈之作縣志所據或其逸詩  
歟又按衡陽舊志寺觀牧雲峯順治間僧超凡卓錫於此  
王夫之撰有碑記今其文亦不傳

釋惟印

惟印長沙千壽寺主僧

逸文贈惟印小序

正鈞按寺中藏有先生手書橫幅贈惟印者中敘與惟印  
相見於南嶽去今已三十一年末署丙辰蓋是年先生避  
吳逆之難再至長沙與之相晤也稚僧云寺中向藏有先  
生遺書二厨咸豐中兵亂毀于火豈先生是時曾以所著  
俾惟印藏之耶

船山師友記第十六

湘潭羅正鈞纂

顧處士炎武

顧炎武字甯人江南崑山人初應邑令楊永言之辟與嘉定吳其沅同里歸莊共起兵奉故鄣撫王永祚以從夏允彝于吳中魯王監國授爲兵部司務事既不克永祚行遁去其沅死之炎武與莊得脫次年唐王起閩中以職方郎召欲赴不果庚寅有怨家欲陷之乃變衣冠作商賈游京口次年之舊都謁孝陵癸丑再謁其冬又謁而圖焉有僕曰陸恩叛投里豪丁酉四謁孝陵歸擒之數其舉沅之水僕壻復投里豪以千金賄太守求殺

之勢危甚會故相路振飛之子澤博爲白其事乃東行墾田以  
自給戊戌游北畿出山海關至昌平謁長陵以下復歸六謁孝  
陵東至會稽次年復北謁思陵由太原大同入關中至榆林甲  
辰四謁思陵畢墾田于雁門之北丁未之淮上次年自山東之  
京師萊之黃氏奴以陳濟生所輯忠義錄指爲炎武作首之馳  
赴山東請勘繫數月富平李因篤親至厯下解之獄白復如京  
師五謁思陵自是往還河北諸塞者凡十年丁巳六謁思陵始  
卜居陝之華陰時有鉅公方任史事以書來招答曰願以一死  
自謝最下則逃之方外戊午鴻詞科 詔下諸鉅公爭欲致之  
以死辭得免其論學則曰諸君闢學之緒餘也橫渠藍田之教



以禮爲先孔子曰博學於文約之以禮而劉康公云民受天地之中以生是以有所謂命也是以有動作威儀之則然則君子爲學舍禮何由今日講學家專以聚徒立幟爲心而其教不肅方將賦茅鴟之不暇何問其他晚益篤志六經謂經學卽理學也自有舍經學言理學者乃墜于禪學而不自知康熙三十年卒于華陰年六十有九所著有天下郡國利病書肇域志日知錄音學五書左傳杜解補正九經誤字石經攷異亭林詩文集

諸書

南疆  
釋史

正鈞按耆舊集鄧氏顯鶴云亭林詩集有楚僧元瑛談湖南三十年事七絕四首第一首云共對禪燈說楚辭國殤

山鬼不勝悲心傷衡嶽祠前道如見唐臣痛哭時

正鈞按原注宋

史朱昂傳父葆光當梁氏篡唐與唐舊臣顏兢李鴻輩挈家南渡寓潭州每正旦冬至必序立南嶽祠前北望號慟

殆二十年

此四詩次三兩首爲陶密翁楊長蒼作自註甚明弟

一首第四首未注何人今以詩意觀之末首殆指些翁弟一首則船山先生無疑也錄此見當日遺民故老心心相印如此

陸清獻隴其

陸隴其字稼書浙江平湖人少貧力學以聖賢自勵非義不取康熙九年庚戌進士廷對極論時務由二甲用知縣歸益肆力程朱之學乙卯知嘉定縣廷議暫抽市肆錢一年佐餉例不加

巷舍隴其如例報徵巡撫慕天顏不悅疏言時方多故陸令非  
應變才部議引才力不及例鑄三級訓用嘉定民大賊罷市日  
號巡撫門乞留巡撫不自安再具疏請復會縣民有被盜殺而  
親屬以讐殺訴隴其詳報俟緝獲後擬旣而獲盜論如律部議  
初不直指爲盜落職歸戊午徵博學鴻儒工部主事吳源起以  
理學純深文行無媿薦未及試奔父喪歸服閱牒部請改教官  
弗許魏象樞抗章訟隴其冤再疏舉廉吏十人隴其其一復原  
官癸亥授靈壽知縣縣于真定最爲磽瘠隴其勸課農桑以盡  
地力請於上官與鄰縣更役以蘇民困尤申明鄉約保伍之制  
舉鄉飲酒禮朔望詣學宮與諸生講論導以躬行著松陽講義

諂諂於義利邪正之辨巡撫格爾古德特疏薦公下部議敘甲子 詔舉天下清廉官廷臣以直隸巡撫格爾古德部郎范承勳蘇赫江南學道趙崙揚州知府崔華兗州知府張鵬翮靈壽知縣陸隴其對庚午科道員闕 諭在廷各舉所知與清苑知縣邵嗣堯三河知縣彭鵬并舉遂奉 諭旨行取是年秋補四川道試監察御史疏請將畿輔災區錢糧悉蠲免勿帶徵 特旨允行辛未夏大旱遵 旨陳言一請免直隸被災帶徵各錢糧一言直隸編審人丁宜求均平一請停捐免保舉之法時御史陳某請停保舉而開先用之例隴其再疏爭會議持前說益堅部議以拘資格致捐納觀望誤軍機負言官職擬削籍謫奉

天安置 上特宥俾還職尋命巡視北城是年秋俸滿都察院  
注不稱職應外調遂移疾歸足迹不至城市益以明道覺世爲  
已任康熙三十一年卒後二年江南學政許汝霖任滿 上曰  
原任御史陸隴其學問優長操守甚善可代其任大臣奏隴其  
已故 上嗟嘆久之曰本朝如此等人不可多得矣尋祀直隸  
名宦浙江鄉賢雍正二年增從祀賢儒從禮部尙書張伯行請  
入祀乾隆元年 特賜諡清獻并加贈內閣學士兼禮部侍郎  
銜隴其學以居敬窮理爲主謂窮理而不居敬則玩物喪志而  
失於支離居敬而不窮理則將掃見聞空善惡其不至師心自  
用墮於佛老者幾希所著學術辨力闢陽明爲禪學謂陽明之

病在認心爲性論者謂程朱之統自明敬軒敬齋後惟隴其能  
得其正宗云所著有困勉錄松陽講義讀禮志疑三魚堂全集

諸書

國朝先  
正事略

三魚堂日記乙丑年九月一條云初四日施行唐言衡陽有  
王爾農名夫之其高風文學不減王价石

正鈞按清獻與先生同沒於壬申乙丑爲康熙二十四年  
先生時年已六十有七後殆未通音問施行唐攷正定府  
志施允中上江人監生康熙二十四年任行唐知縣王价  
石名光承上海人明季諸生章載謀景船齋雜記云明季  
吳日干騏王价石光承計子山南陽三人竝以高行著今

錄  
四卷

云松江王价石  
原注名列

少有文名而務敦實行非近世

王鴻博

王岱字山長一字了庵湘潭人明崇禎十二年舉人入國朝  
官隨州學正京學教授廣東澄海知縣康熙己未薦舉博學鴻  
詞科著有了庵全集

湖南文徵  
姓氏傳

了庵集寄會青藜書云昨讀佳選可稱極盛然吾楚存沒詩  
家除竟陵外如王子雲曹石霞吳旣閑舒康伯夏人叔夏振  
叔程青溪胡石江高處厚趙簡如張讀鶴湖南如周伯孔車  
孝思王而農馮樸公楊九嶷過無過龍季霞龍孔然徐蔚子  
楊如斯郭幼隗易康侯易無畫周士儀嚴平子羅月江羅紫  
蘿指不勝屈卽今弟集中凡有姓名者皆能詩之人亦多未  
得埧入弟十年前與石浪秋楊又仁商選事未遂後與金會



公舒康伯訂商又忽外轉澄令此事頓廢今無暇矣

正鈞按曾青藜名燦甯都人易堂九子之一常選海內名家詩號過日集蓋卽書中所論遺書中山長姓字惟一見南窗漫記云龍季霞欲矯竟陵纖弱之習與王山長夜語詩云云詳上弟七卷季霞爲先生同歲生丙戌丁亥游湘鄉與之唱和故于山長亦相知聞山長歿于康熙己未此書蓋寄于官澄海令時先生是時尚存也

鄭中丞端

崔鳴騫

鄭端字司直直隸棗強人順治己亥進士選翰林庶吉士辛丑改授工部主事轉戶部郎中己酉典試江西升貴州提學道僉

事丙申補陝西神木道僉事時制府尊嚴藩臬而下率長跪伏謁端獨遵庭參三揖之制同列震駭壬辰補浙江分巡台州巡海道旋調陝西分守涼莊道所至以廉明稱丁卯升湖南提刑按察使明年晉安徽布政使故事賦有奇羨不歸庫藏以留佐公費爲名端悉令入計會 聖祖南巡聞其清廉 御書端清二字以賜之次年擢偏沅巡撫益勤求民隱舉賢劾貪奏全給官役俸工又地丁缺額五十餘萬疏言非清丈不能窮豪強欺隱之源塞良善包賠之累且請減造魚鱗圖冊舉行朱子之法雖格於部議識者韙之閱一年庚午調江甯巡撫時淮揚二屬涸出積拵田二萬餘頃部議一律起徵端奏新涸之田按畝起

徵不特在逃之丁觀望不前卽現在之丁亦將畏累而去疏三  
上得停徵過半淮甯濱河廢地數千頃部議不肯蠲除端復爭  
言災患之餘重累包賠田賦愈逋民生愈困請自康熙三十年  
始概與蠲豁積困頓蘇又疏免加靖邑坍沒之糧及豁免江都  
牧地正賦外租米邳州缺額商稅其治民以嚴杜好訟爲安養  
善良之本教屬吏以平情爲息爭之道壬申卒官爲學宗朱子  
爲政宗新吾呂氏譔有朱子學規政學錄及日知堂文集方宗誠相  
室集後編鄭中丞事略

潘傳云吳逆旣平我大中丞鄭公端聞而嘉之屬郡守崔某  
餽粟帛請見先生以病辭受其粟返其帛未幾卒于石船山

正鈞按 國史儒林傳彙采余傳亦載此事均云未幾卒  
故劉譜以餽粟事隸于辛未今攷通志職官表十二鄭端  
任偏沅巡撫爲康熙二十八年次年卽于養志代去則屬  
郡守餽粟正是此年先生年七十一歲去吳逆之平已十  
年矣又按職官表衡州府知府崔鳴鶩直隸任邱進士正  
以二十八年任鳴鶩有重修石鼓書院記載衡陽縣志  
又按柏堂集後編有請增祀董子詞狀云棗強士風樸實  
康熙間有鄭中丞端學宗朱子治效新吾箸有日知堂集  
朱子學規等書采入四庫提要又云鄭中丞前已稟蒙奏  
請入祀鄉賢按集又有告崇祀鄉賢鄭公文以光緒元年

十二月奏準也

張明府芳

張芳字菊人號鹿牀江西句容人順治中進士知常甯縣八載  
清操如一日勸建桃花洲書院課士親爲指授一時成就甚衆  
以事去職遺愛至今弗替云

湖南通志名宦  
常甯縣志

常甯縣志藝文張芳與王船山先生書云王先生芳名飛于  
大江南某齷齪湖湘且十年書筒未一相及雖私心願言難  
覲識面而鄙人之不足與納履結韞固可知矣頃襪被雁峯  
有客持薑齋落花詩至初不知薑齋何許人展讀一終見其  
綺繡嶙峋瀏漓頓挫中譚體十首詩尙在徐山陰袁公安以

上揜卷長思當非而農王子不能已而又念王子 解河上  
公單傳龐蘊及弟之旨或不好爲此種筆墨次日遇君家愷  
六乃締知方平仙人不妨戲擲長爪姑丹砂也落悴而花榮  
落今而花昔此龍樹論所干言未竟者耳何必寓禪于詩乃  
爲禪理哉愷六又極言葺齋近日著述淵廣覃精經苑弟昔  
年嘗欲博搜明代經傳彙爲一編謂經傳之性情血脈卽讀  
書種子也世運有晦冥而此未絕之種子可以維持天地剪  
諸事業則與日星同照河山并峙否則卽爲七十子口授與  
壁內之遺音紹往開來統緒不泯貴鄉仕隱兩途之先正弟  
祇見山艸堂郝氏遺書其餘未見者何限而末學之徒各是

俗師輕非往古大抵英人靈智半耗于科名才士淫思多耽于詩賦彼義疏之雅故彖繫之微言不墮蟲魚卽淪象罔宇宙大矣豈無靜修仁山伯原之徒好學深思潛持風運不必盡如聖子皋羽億翁諸君子見志詞章以王先生學解深源一物莫之窺年未五十著述大就藏之名山傳之其人旦暮遇之必可期也雖井中鐵函不以當河汾之論箸矣何時得一披帷覽祕極論天人之際哉

正鈞按落花詩自序云庚子冬初得些庵大觀諸老詩讀而和之庚子爲順治十七年今攷湖南通志職官表十四張芳以順治十一年任常甯知縣傳云居官八載則寄先

生書正在庚子辛丑間故書中云先生年未五十也



船山師友記第十七

湘潭羅正鈞纂

歲在昭陽大荒落正鈞補輯儀徵劉氏王船山先生年譜訖又以暇日譔集先生師友爲十有七卷往者新化鄧氏顯鶴博綜楚故所箸沅湘耆舊集嘗于先生之友別爲一卷表章不遺餘力然其所述以詩存人又復限于湖外故夫文采不著越在他邦者則闕遺而不載劉氏年譜則凡于交游中有關涉者附注于篇雖攷訂精核而徵錄不出遺書又其書專以出處義行爲主其于交誼已所致略今竝采二家之說凡遺書姓名可見者排錄于冊而他書中有涉先生友誼者亦竝錄之積久得百五

十有七人其爵里事迹則博稽之史傳通志及郡邑之書參以當日遺臣之紀述近代私家之載記篇幅闊者節錄其文略者并數書以爲一傳遺書已具名字里居或傳誌之屬而他書無攷者乃止就遺書所紀而錄之而皆注其所出于下方其徒有姓字見遺書者則備論而仍闕之以待異日蒐討先生從王嶺外永厯實錄所傳之人甚衆行遞而後湖外遺民相聞問者必多然以不得顯據固未敢臆爲之及焉凡遺書一語一言及于其人者舉摘錄之于各人小傳之後以相印證而他家之書信而有徵者亦增詳其間至先生與其人之詩文則遺集具存無庸贅敘惟標舉年分具列其篇目覽者可按序而參閱也

其可資攷

訓者則于按語中引及之其采之諸書而間有疑難稽之他說而時有發明者則參互稽覈別爲按語以附于後原夫史家雜述若小錄郡書別傳之流類皆博紀名賢私綜國故至宋世朱子始有伊洛淵源之錄而近代儒者盛傳學案宗派之書其原蓋出于史遷仲尼弟子傳先生遠世守貞屏絕聲氣今之所記惟統名以師友極知于先生無富豪末徒以景仰之微衷未能自己故凡所編錄一循出處區爲次第先生淵源家學外間無問業之師惟列當時提學舉主他若蔡忠烈諸公有知己之言者次之而謹以父兄編之卷首其時鄉先達如伍學父諸人會文之友如夏叔直諸人及乙酉丙戌避亂湘耒所爲主諸人在戊己從王之

先惟嶺外同僚以名位相次取便尋檢故釐爲二卷蠟真于前  
辛酉返楚而遂轉徙郴永十有餘年至歲庚子迺始卜宅湘西  
其閒過從類皆遺老稍以類從分爲四卷先生寢迹窮荒及門  
尠有聞者今就諸書所見次爲遂進一卷門人一卷親懿子弟  
一卷喪世患難故時亦有方外之交而顧亭林諸君聞聲相思  
見于紀述則亦不得而廢焉以殿于遂他如五十自定藁戊子  
有永興廖鄧二君邀宿石角山一詩六十自定藁有青艸湖與  
黃生看遠汀落雁一詩徒以姓見無從稽索外此則家世節錄  
述武夷先生被流寇之難舊交黃岡奚鼎鉉陷賊中曲意相脫  
亦見文集石崖先生  
傳略并逸文自序 永厯寶錄嚴起恆傳先生自言上疏請允

輔臣去國萬朝魯可藻請逮治高必正力爭乃已按鼎鉉當字

中雪與先生締交甚早

按鼎鉉居黃岡必正由後應試武昌相識病枕憶得已卯有劉子參計偕北上

便寄奚中雪一詩當卽一人無疑

而節錄有先君終不與語之文高必正初名

一功從李自成起羣盜反正遂封鄭國公行狀云高必正慕義營救府君以其國讐也不以私恩釋憤今之所錄姑從屏真抑亦先生之志也

邗江槩戟鬱爲文德於穆庭訓道存淵默石崖貞苦素業逾鮮春秋世學孤誼曷傳述父兄卷首

王出郎署水由憲臺明發駢駢甄我楚材鑒洞梁溪誼篤安成羽儀寂寞神聽和平述提學舉主弟一

江左偏安楚實外藩迹阻情疑竝遘災昏憲旣前摧曠復中圯  
貞晦窮崖以報知己述鄉邦達官弟二

嶺表彈丸勢屯道蹙嶽嶽巖嚴抗情文陸人謀未同冥運已數  
三諫云窮脫身朝籍述嶺外僚友弟三

皇輿遘閔扶義颺舉間道崎嶇迴翔展亡慝時恩愍把劍激昂  
悲謠未已鐵騎縱橫述從王諸友弟四

勝衣就傅榆社周旋翩跹諸老風櫨遂先伍張二壘蔚我儒宗  
淒矣涓陽偕命連峯述鄉邑先輩弟五

匡社松聲芳洲杜若文譙從容豪情踴躍如何蘭蕙先秋早萎  
匣絃已絕鄰笛空悲述早歲會文之友弟六

百六在運獻尤封豕悽我哲人越疆投止蒙犯霜霧不廢詠歌  
天離地阻失路如何述避寇爲主之友弟七

賢者避世哲士佚名爲出爲處匪敢自明獻侶幽棲聞聲惕息  
瞻望南雲悲來填臆述去官借隱之友弟八

湘水迴湍船山衰艸天闊窮荒斯文終老西臺竹哀嶽祠路曲  
德必有鄰采薇芳躅述還山同志之友弟九

邈矣荒塗于嶽之陰惻惻無俚何來足音結轍蕭辰挑鐙永夜  
海徙山遙重此晤會述山中過存之友弟十

睽懷良執月匿參熒窮年寢迹關河浩冥爾音不遺三歲是紀  
延陵十字歿而猶視述山中通問之友弟十一

敷我明德蒸彥實晞握衣趨謁迎弄以歸嶺雲朝橫巖花夜寂  
誰實遂來緬懷良覲述遂進弟十二

橫渠正學孤鳴誰和百世聞風矧茲親炙翩翩章生惓腹躬圍  
草堂風月共領至言述門人弟十三

桂蠹千載承述師志雍雍劉熊先聲竝美亦有懿親翻飛載鳴  
巋然蕉畦爲楚耆英述親懿子弟弟十四

溪虎夜嘯潭龍晝吼九死崔嵬埋心嶽阜茹蘗知廢禪緇早披  
凝然仗節義旗同麾述方外之交弟十五

衡嶽拔地中有達人緝伏明姿志互千春文隨身隱道以神超  
夢而不見引領長謠述外聞知聞之友弟十六



心希絕學十駕而憩載綴舊聞亦以論世綱晦俾曜抱臯甯辭  
尙想亮迹寤寐承輝述敘贊第十七